

聽  
雨  
樓  
隨  
筆

聽雨樓隨筆卷八

劉庶埴字元會原籍福建祖廷標

居保山雍正癸卯拔貢官四川蒲江縣居家孝友在官有  
循聲署夾江時訪知王公開運與其祖同殉流寇之亂後  
人名忠溪者貧窘乃攜歸以女孫妻之其尙義如此與兄  
庶壇均工詩咏龍池夜月詩云珠抱驪龍睡天開皓影遲  
一輪清印處萬斛漫湧時驚鷺偎金埴每中秋現影其中笙簫度  
碧漪蛟宮與月殿明鏡對光儀庶壇字杏友句尤清麗贈  
客云他鄉髮向燈前白故國花開夢裏紅訪隱云繞樹藤

蘿五畝宅閉門風月四時花爲人傳誦

戴羨門先生三錫鎮江人工篆隸起家縣令署營山順慶  
太守薦相士一見稱其大貴回見太守問何如相士云戴  
令骨格應官一品名位遠出公上時有巡檢某與爲同寅  
聞相士言笑曰諛詞邀厚贈遊士熟套耳戴某安能至高  
位後累陞竟爲四川總督始服相術之神當官布政時巡  
檢大懼浼人代陳狂妄之罪求全其身家先生曰吾以直  
道待人豈肯挾私憾陷害人但某輕浮不足拔擢巡檢終  
其任不遷官亦無他患先生當權時素雖相契厚相視如  
衆人絕無偏徇如此氣度爲大員無愧張乃孚賀羨門先

生擢四川總督云雪山斥堠留嚴武鎖鑰關門借寇萊天  
子已無西顧慮蒼生尤賴靖邊才室需求木看爲棟鼎重  
調羹冀作梅自古益州形勝地天彭井絡望中開先生以  
清白傳家資產本非豐裕嘆夷破鎮江家人逃散所有爲  
亂民掠取公子官京師眷口無傷

僧慈量號玉泉幼多病披剃爲僧居安岳國清寺神姿秀  
異善書工詩有歸山詩云心持戒律已多年退息魚山倚  
石眠滿地落花風自掃從今不必更談禪

康熙間考翰林題爲閨怨詩中用一二三四五六七八九  
十百千萬雙單丈尺等字以溪西雞齊啼爲韻往往束手

而能者則爭新闢奇心花豔發狀元歸允肅尤爲擅場鈕  
玉樵作閨怨詩蓋頭用雨絲風片烟波畫船八字詩亦甚  
佳有詩中用金石絲竹匏土革木皆才人狡猾之技合州  
張西村七律中更用江流有聲斷岸千尺山高月小水落  
石出風片雨絲雲飛霧捲漁竿畫船烟波晚釣等字亦以  
溪西雞齊啼爲韻更難措手而詩特工妙山下風煙罨畫  
溪釣竿絲捲小船西斷雲漁弄飛波雨出霧江寒叫月雞  
千片落花流水送尺魚沽酒晚歸齊醉歌白石還高臥任  
有猿聲兩岸啼漁歌聲小出前溪一片雲流石岸西山斷  
風高吹笠雨江空月落聽潮雞乍開烟霧迴船晚未挽竿

絲下釣齊咫尺波光圖畫裏千湍水激有烏啼山斷雲高  
水滿溪小船流出畫橋西釣絲尺捲晴無霧漁隱鼓談甕  
有雞岸石秋江千丈落烟蓑風雨一竿齊晚來片刻波聲  
聒魚翠驚飛映月啼

漁洋先生記破山和尚事蜀亂時李占春迎和尚營中勸  
賊止殺賊以大豕肉進曰和尚噉此當封刃遂食肉余署  
榮昌至一寺僧略知經典借破山語錄閱之破山本儒士  
詩亦不盡禪機佳句如園裏竹雞晴引子崖前石虎老生  
斑七絕云嶺畔桃花相映紅恍然如醉薜蘿中通身長出  
參天棘刺殺山頭瞌睡翁新穎奇警又云黃鸝不識吾生

意叫落庭前一樹花皆可喜也

長洲高願字樗仙號達叟太學生好遊足迹幾徧天下五岳嘗遊其四以錢湘船曹寅谷爲師在都與劉金門張船山吳穀人往來得詩一千餘首刪存二冊名梧雨集又工詞亦刻集樗仙少時與弟芾堂以文藝切劘芾堂入翰林爲御史樗仙終困場屋乃由臆錄館議敘就敘州南溪縣尉平生友朋詩酒之樂足以自豪來川咏蜀道云蜀地留餘孽愁雲壓陣低議團民死戰掠地賊耕泥烽火延湖北干戈及隴西嫖姚當世有指日靖征孽與中江李夢蓮善夢蓮春闈罷過鳳翔雪中訪樗仙樗仙喜而賦詩云蜀中

山水雄且清靈氣鍾毓產異人太白仙才髯蘇放馳騁唐  
宋莫與倫一千年來騷雅歇孰執牛耳誰扶輪岐陽十月  
雪高臥謝塵轍達夫閉門作苦吟作苦吟鶴伴梅花正清  
絕何來錦江仙樹李訪我停車擲鞭弭天矯猶龍氣吐虹  
座中直欲輕餘子自言一第屈春官雄心每每聞雞起快  
馬輕裘歷五都索酒銀瓶常笑指興酣點筆學荆關山骨  
水聲俱驅使又言黃金臺畔挾策時交臂逢君悵失之此  
日天涯忽萍合與君互證奚囊詩復言此會亦暫耳行將  
計偕長安市春風許看杏花紅姓字金泥博衣紫我聞此  
言重嗚咽男兒底事如鳩拙兩字功名誤煞人黃埃烏帽



輕離別君不見渡口劉郎與阮郎白雲雞犬長生訣桃花  
流水自年年兔走烏飛驚電掣爲君勾留謀古歡獵獵風  
聲增暮寒玉簫吹冷鳳凰去嶽雲棧樹空漫漫匣中寶劍  
湛秋水世事如雲薄於紙且勿高歌行路難滿酌邨醪割  
野豕醉中不敢登高樓作賦恐增客裏愁眼前之人古狂  
狷吁嗟骨傲難封侯不如歸去好作耕田識字叟否則綠  
蓑青笠烟波浩蕩盟輕鷗

南充任太史瀚值春闈與羣友北上舟次赤壁夜月朗然  
慕東坡故事與諸友狂歌劇飲黃州守禦某聞喧呼聲徹  
署內晨遣走卒持牌行拘任於牌背書一律覆之云舟泊

蘆花淺水溪友人約我泛金卮因歌赤壁兩篇賦正是黃  
州半夜時城上將軍原有禁江邊士子總無知君侯若問  
真消息曾有芳名到鳳池乃躬謝而厚禮之

德清蔡公緯寅字典三號廢菴康熙己未會魁任四川保  
寧知府有送賊至者詢之自供爲貧所迫夜予錢二千縱  
之去後十年歸里舟泊江干有人跪前以首頂盤盛煑熟  
鷄卵奉獻蓋公素所嗜者訝問何人云係某年所放賊得  
二千錢小貿易家自此裕知公不受金錢故以此獻公喜  
食二十枚竟以此停食得疾卒

濰縣郭次虎太守熊飛現爲直隸藩司任夔州時見於官

解渾樸是吾東人本色其族弟小房太守夢齡任順慶來  
省垣兒子紹宗同寓忘分加禮梓誼情重未幾陞蘭州道  
去竟未得一見離任作七律四首留別士民刻石甘露寺  
深情溢於言表銀章典郡甫三年逾格 恩綸賁自 天  
纔得鳩巢容拙守敢望鶯谷遽喬遷詩書未洽文翁教父  
老漫遺劉寵錢唱罷驪歌暗惆悵重遊何日到金泉四境  
恬熙歲屢豐閭閻安堵賴天功村無犬吠萑苻靖廷有懸  
鞭雀鼠空舊政深慙遺愛少離懷怡與去鄉同榆關月夜  
笳聲裏可許嘉陵一夢通鍾靈朱鳳鬱崔嵬先達聯鑣列  
上台定卜聞風投袂起何期立雪到門來識慙許劭衡人

鑑望切相如作賦才桃李新陰猶未滿根株留待後賢培  
民品可畏卽吾師一片冰心勉自持身易安時緣苦慣人  
堪對處是情癡猛寬交濟寸衷歎詛祝靡常清夜知莫怪  
攀轅留不住萍蹤漂泊本如斯

王輔臣敗吳三桂追至保寧巡按郝浴激三桂使戰賊走  
觀音寺忽見一人烏馬長矛建皂幟馳入文秀軍奪其壁  
壘空中雷鳴不知是何神將

湖北蕭芝蕭鎮俱解元人稱蕭解元家闡文皆選刻實有  
衣鉢傳授鎮兼工詩在蜀與吳白華學使登果州金泉山  
甘露寺步韻云金泉矗危峰嘉陵駭奔浪一片果州城影

落琉璃帳徐步出西郊  
心目豁平曠維時日在婁  
稍見桐花放欹崖弱柳垂  
湫澗春流漾山居三兩家  
亂石相依傍新烟起遙岑  
山氣益增王時有白紙錢  
飛掛陳人壙晝然古洞開  
門戶盡東向隨喜麗跋藍  
甘露幸分餉所期凡骨換  
無使塵容抗攜履繭嶺岼  
璇宮鬱相望奮衣凌絕磴  
身置層霄上寶臺勢嵯峨  
曲水聲悲壯霧連朱鳳飛  
鶴共紫雲颺花落滿前楹  
春去索誰償瞥見千釋迦  
趺坐丹青嶂似聞第一機  
白法義獨創蘇黃忽已逝  
誰與山靈唱今朝天氣晴  
雪色梨花漲茸茸細草生  
畫出青鞵樣席地籍柔荑  
劇飲傾盆盎蒼翠拂襟裾  
疎篁走俗狀緬懷袁李蹤  
金

釵秘藏白日大還成寸丹輕瑛瑤空餘簡寂居坐使幽情  
暢因依三景明抖擻六坐障側身天地間何處分恩謗登  
高一賦詩大雅夙所尙酩酊暮歸來心游胞重閨

楊宏緒號丹山新繁人康熙辛丑進士歷官浙江按察所  
至有能聲工文章善書佳句如泉通石鱗山根響樹隱陰  
厓日影遲因嫌草密呼鋤徑爲惜花欹自架欄典試閩中  
和周櫟園仙霞嶺詩有雲收人語層霄外磴轉天浮曠野  
中之句尤爲奇警

安岳王允吉號滿江少年在軍營晝夜走六百里制軍觀  
兵教場箭道首尾設兩的列彩架於中置鴿罐中懸其上

命將卒以鎗矢中者獲賞皆未當意允吉馳馬一矢破的馬逸超越過架數武矣回身舉鎗碎鱗鵠飛刺天一軍喝采復從容發矢中末的制軍曰眞將材也嘗從軍剿蠻失利將斬同營守備李琳以家口保之曰王某驍將再戰不克願與同死限三日破賊是時蠻據大岡守備甚設探其形勢三面險峻後面稍平悉深菁乃檢健卒五百犒以牛酒又括營中羊數百夜半令老弱驅至大岡下轟以巨砲鉦鼓齊鳴蠻以官軍突至盡力防禦石矢俱下允吉率健卒潛從間道攀援而上火焚其巢蠻驚奔竄斬首千餘生擒數百賊遂平西藏之役副岳將軍往夜中賊劫營營卒

驚擾下令鎮靜毋譟賊旋遁問司夜爲誰以公子對命斬  
以徇閭營祈請不允曰私吾子何以令衆軍中股慄以總  
兵歸老年七十卒允吉狀貌雄偉絕人一飯斗米一飲百  
杯威嚴可畏古名將無以過也

川楚教匪之亂諸大臣効力行間惠瑤圖尙書於丙辰春  
剿辦枝宜灌灣腦涼山諸寇復至襄陽擒獲劉起榮及由  
陝入川連滅二渠魁鄭觀察成基軍中作詩以誌云頑民  
誰使警烽煙螳臂當車事可憐數萬生靈同穴蟻一軍死  
門慘啼鵑聶傑人張正謨劉宏鐸據灌灣腦抗拒官功成  
八月如收劫嘉慶元年正月教匪起事殄散三時喻解懸



記得深山愁匹馬秋風秋雨兩年前

余委辦張正謨劉宏鐸之事匹馬往來江

家壙者五晝夜

白雲黻黻隱山峰祆氣相兼霧氣濃覃正

涼山頂佛廟官兵設卡攻圍此山最高常為

霧罩不見山頂惟羊腸小路曲盤石磴而上冰雪磴危人

怯步金蛇光燦礮穿松

晝夜以大砲轟擊如雷霆之聲

風高峻嶺難棲鶴

月影空潭不照龍

賊因糧盡取水甚難欲從山後龍潭潛通官兵盡力圍之復伏兵於路乃痛殲

焉最喜臨晨飛露布將軍恩賞許酬庸

余以涼山蕨功蒙保奏應陞即用

襄棗祆氛悵駭犀爾來將士說青齊

此次用兵以山東兵為最得力者羽

林勁旅誇旗射

襄陽地勢平衍奏調火健兩營滿兵二千名剿賊以其善弓箭也

總統新

銜試鼓聲

特命永都統為襄陽總統以收剿賊之效因無功改命瑞圖尙書代之丁巳春二月於漢東大

洪山生擒賊目

戰壘空山春草遍馬蹏逐寇夕陽西漢東

劉起榮解京

猶記擒渠日柳影桃花正滿谿川北兇渠羅冉驕通巴儀

廣任逍遙

冉文倩羅其清滋擾川北兩年有餘地方受其荼毒最慘烈焉

虎賁舊有龍驤

旅

此次掃除兩逆以索倫吉林兵爲得力

鳳詔新加大府標

戊午秋特命瑤國尙書領辦川

北專剿羅冉二逆

麻壩鯨鯢能恃險方山猿狖已紛凋

箕山分竄後冉文倩

據通江麻壩寨羅其清佔大鵬山大兵攻克大鵬羅其清已成瓦解之勢追至方山全家就獲

可知匝月

多助業尤喜功成在歲朝

己未元旦掃蕩麻壩寨生擒冉文倩痛殲賊衆

嘉慶辛酉二月參贊將軍德由陝追賊入川至大寧二郎

壩大捷擒斬五六千救出難民數千委鄭成基查點半係

秦隴之人婦女幼孩傷病不支哀詞慘顏不忍見聞鄭捐

資買舟送回漢上作難民吟云趁得扁舟返故鄉秦雲隴

樹日相望空餘皮骨形如鬼怕著衣裳背有芒父子已拼  
生再世田園何幸出戎行焚香豈止千聲佛萬口同音拜  
聖皇難婦吟云弱絮隨風不自由半懷驚懼半含羞故鄉  
遠隔雲千疊賤命幾填土一坵往事那堪悲破鏡此身纔  
信是浮漚馬前泣向將軍訴哽咽無聲祇叩頭

楊展以恩結武大定袁韜竟爲所害令人髮指復合兵圍  
城城破展子景新以親丁三百逃妻罵賊不屈死賊追景  
新眷口投江死景新向我大軍投誠爲總兵効力轅門時  
袁韜自滇收二三百人投總督李公國英授參遊之職景  
新哭遇於轅門忿然拽韜下與拳足交加拔刃欲斫軍士

獨阻韜抱頭鼠竄李公怒其亂軍法各杖三十請旨部議  
以景新父仇不共戴天雖事屬前代情實可原授安慶鎮  
總兵袁韜負德賊殺應抵因事在赦前免死革職回黃沙  
驛病卒大快人心恨未刃剗其腹也

秦良玉未知究竟如何或云殉節或云病故歿後子某承  
襲子死妻沈氏襲爵有逆僕沈責之僕投朱榮藩言沈氏  
容貌豔麗金珠盈筭榮藩令孫可望等兵攻石柱虜沈氏  
爲妻後知僕言妄乃磔其僕殺榮藩送沈氏還石柱

榮藩明宗

室據白帝城稱  
王而所爲如此

竹枝詞皆紀風土采詩者所必錄也小白華山人巴渝竹

枝云城上高樓江上峰重重金碧倚虛空晚來隔岸推窗  
望上下燈光萬點紅滾滾長江日夜聲三門洞水亦縱橫  
天生雉堞金湯固不許寒潮打石城雙江繞郭漫揚舡解  
唱渝歌賈客聽誰畫東南山一角朝來雨洗佛頭青朝天  
門外水如油喚渡紛紛晚不休六七月間沙浪惡江心愁  
煞木蘭舟荒坡厯落臥牛羊指點詩人弔夕陽草沒蓮花  
池畔路涵園不敵午橋莊佛圖關險護風雲誰識當年儒  
雅羣讀罷殘碑詩數首斜羊駐馬弔將軍買得梅岩宅一  
區隔江烟樹望模糊何人攜得雲林筆倩畫曉園十景圖  
倚門每笑客龍鍾屋小如舟着個儂終古烟花流不盡覺

林空打五更鐘燒香盡說朝真武此是當年選佛場鐵筆  
一枝絕依傍乞靈空自禱空王刺桐花落紙錢飛女伴翩  
翻簇幾圍雨洗濃粧羅帶溼通遠門上野墳歸請兵全國  
忠無貳踐信酬頭事太奇士女踏青出城去將軍墳上草  
離離王生歸去草萋萋農事關心雨一犁幾處郭公啼不住  
勸耕人過海棠溪鉤藤酒熟佐江魚象鼻彎彎吸自如揖  
遍同人方許飲始知禮讓在山居說法何人悟上乘名藍  
精舍盡憑凌探奇未果花巖去不遇詩僧只戒僧合陽竹  
枝云迎恩門外報班春演出春亭廿九新士女如雲堤上  
下看春人看看春人踏青共到東臺寺野酌歸人帶醉多

堪笑求嗣諸女伴倩郎石打打兒窩刺桐花落杜鵑開到  
處風吹錢紙灰最惱一般閒子弟周家坡上野墳來榴花  
照眼醉人多午後紛紛盡下河怪煞龍舟少頭角也來江  
上門凌波嘉浩兩水抱城環村落人家圖畫間何處花香  
薰醉客白蓮開遍藕塘灣自分中秋見月華不知清怨落  
誰家擁來火樹笙歌沸昨夜西園盜去瓜學士山頭雲微  
凌霄閣上對斜暉登高不落參軍帽白插黃花帶醉歸雲  
鬟堆首步生蓮夜夜人家鬧慶壇進酒不容空手過席中  
捧出白磁盤文明樓上霧初收烏木灘頭水亂流好把水  
痕驗科第江波輕泛墨花洲

娃娃魚卽鮡魚出雅州河中四足能上樹作兒啼故俗以  
娃娃呼之瓦屋山溪中有名瓦魚者味極美咏之云游淵  
久慣慕巢居四足盤旋出碧渠忽訝兒啼爭仰面始知綠  
木可求魚臨淵欣羨偶垂綸一簇游魚躍綠蘋本欲釣瑣  
偏弄瓦春風育子水鱗鱗

昌黎謝自然詩云果州南充縣寒女謝自然童駛無所識  
但聞有神仙輕生學其術乃在金泉山又云須臾自輕舉  
飄若風中烟又云孤魂抱深冤似爲祇所害戒人學仙意  
也按自然本吾東兗州人父寰居果州舉孝廉秘書省校  
書自然自幼不茹葷家在大方山下山頂有老君廟自然



居之常誦道德經黃庭內景十四歲絕粒煎皂莢湯服之  
卽吐痢下蟲無數體輕目明惟食柏葉後不復食亦不飲  
從道士陳太虛受紫靈寶錄刺史韓价疑其妄閉之東閣  
累月出之膚體宛然聲氣朗暢使其女自明師事焉父寰  
宦遊歸見自然所爲以爲妖妄曰我家世儒風五常之外  
非先王之法何得有此鎖閉堂中四十餘日益加爽秀乃  
驚駭自然移居金泉山室僅丈餘常有蛇虎相從一日上  
昇有白鶴飛鳴仙樂振響南充鶴鳴振樂諸山以此得名  
今飛仙處及隱仙洞尙存洞旁刻貞元間詔敕蓋刺史李  
堅聞諸朝也金泉山神爲陳壽卽作三國志者壽南充人

讀昌黎詩或未悉自然本末錄之見非爲妖所害然後世  
有道士觀年內某夜必有飛昇者迹之乃爲虎食又牧豎  
坐山厓下身忽騰上皆謂坐此可得仙久乃見山半巨蛇  
吸起似飛昇實戕於物者多矣大儒警世之言可寶

僧碧厓不知何許人乾隆間來忠州居白花山年九十餘  
坐木龕晝夜不睡知州事翁霍霖過江造訪留詩云內江  
一老僧不言自了了臨江一老僧不睡無擾擾要知享大  
年甲子人間少我初蒞臨江聽鐘度清曉因尋白華庵但  
見風旛裊問師在釋毘入門半林篠獨坐彌勒龕枯木一  
握小眉毛勁且長眸子清而瞭直有舍利光圓頂透毫杪

自言三十年定坐無更掉贈我藥師偈爲語頻深渺報以  
田水衣聊作人情表我亦欲參禪無奈公案繞

富順李定堂名榮安耽詩豪於酒陳鍾溪周東材兩學使  
方有堂方伯宋梅生觀察皆器之晚年家益貧而意氣不  
減於前一日命酒集知交懽飲爲詩數首談笑而逝門人  
輩醵金刻其詩山館云課餘何事坐忘機領畧山中物理  
微初種瓜知緣樹上怒生筍不受籬圍晴檐門雀爭蟲臂  
破網懸蛛掠蝶衣鎖日幽棲無剝啄東鄰邀飲叩柴扉晚  
泛瀾巖云未盡昨宵興重來泛晚烟月隨人到岸風代槳  
移船遠樹連雲淡疎星落水圓竹橫歸路影徐步悟詩禪

游目云地僻景尤妙心清趣自生風來扶樹拜山出與雲  
爭野屋容林轉春田讓水平荷鋤人過處搖尾犬偕行瀟  
定橋竹枝詞云瀟橋兩岸盡人家亂石堆雲板屋斜屋外  
石牆牆外圓春來多半綠楊遮絕巘危崖險插天山樵日  
日斫雲煙擔頭挂得香花草欲向長街換酒錢五言如詩  
魂隨夢遠月影與霜俱午中方見日天半盡堆山秋聲涼  
入雨野興爽迎風窗風搖燭燄簾影上花枝雨聲濡爆竹  
墨氣潤春聯留客千絲雨驚人百鍊詩無絃留古意絕調  
寫清聲長橋通客路脩竹隱農家野店人呼飯山村女賣  
茶矮檐雞上屋荒野鵲騎牛石助灘爲虐波掀岸欲流雲

勢堆山峭灘聲聽雨訛波平天浴水噪樹鳥窺晴七言如  
別况略言都共喻新詩欲述卻多忘忙雲引岫作飛勢亂  
石觸泉有怒聲久客人歸途易誤思鄉心急路偏賒滿院  
書聲清罄和半窗花影老僧分節飲都教成一醉清談也  
必到三更三更月白江干寺幾點燈紅水面樓

貞烈之婦千載如生有死數日顏色如生者人咸異之更  
有奇者明季流寇擾川中攻石公寨毀木取棺板遮護石  
矢開棺見一婦貌容如生刺之血流賊驚問土人云係何  
象乾之婦爲藩司書吏病歸與婦訣婦曰夫存我存夫亡  
我亡余志已決斂夫畢托幼子於姑投繯死葬此山下已

三年矣賊曰貞婦爲封其墓

黔江令朱靜生乙未遊陶然亭及城西諸寺感舊詩洗盡  
綺語一氣流轉錄之十四年前夢尋幽陟此亭浮雲拋去  
日舊雨散晨星野荻依然綠西山不改青只憐塵劫換秋  
髩已霜零沈雲巢爲江蘇參議靜生師也送其入蜀詩云  
捧檄西川去崎嶇敢憚勞雨餘江水闊雲盡蜀山高得路  
輕三峽籌邊熟六韜應思部齋裏文譙醉醇醪老我風塵  
久人情未盡知初心應不負廉吏似難爲蓬島迷前夢烟  
波約後期望君勤報政萬里慰相思結體高老於此道大  
有功夫

朱名家庚

新津河中一屍被殺未得凶犯驗岸有腳迹尋跡至路旁  
廝內見血點旁有小屋差指此民家係某役常往來處搜  
之得役衣服鐙籠疑役與民婦有姦因而殺人役不承訊  
婦供與通姦者更有李少木拘至跪一日夜無辭明午復  
訊突一婦堂外喧鬧云係死者某喊冤召而問之求喚其  
妻子至歷道家中瑣事甚悉因言是夜李至婦家宿穴壁  
窺之爲李所覺開門追殺棄水中李伏罪案始定問魂何  
得附婦人言被殺後魂入東嶽廟神令之來因憶相驗時  
路旁實有其廟信鬼神之在在有也後婦醒竟不知此事

新津令宋由溪  
瀨親爲余言

成都崇義橋舊有紅蓋樹大十圍高六丈許樹圓如蓋結  
子深紅李其昌詩云紅豆樹生紅豆枝曉烟泣露晚秋時  
纍纍結就相思子知道年年卻憶誰

蘆山知縣趙河字燕鄰雲南通海人康熙壬午舉人性孝  
口不言阿堵書卷不去手於詩初愛太白後慕少陵作詩  
不存稿謂古詩十九首不肯以姓字留人間居官不半載  
告歸林下二十年布衣蔬食如寒士咏官廨梅花云一枝  
擬折寄相思鄉路三千托向誰洗雨梳風花瘦盡不堪倚  
月聽橫吹卸簾後居廣福寺彌勒同龕久佛燈對榻明雞  
迴荒徼夢樓滿大江聲家國身何補行藏道不成便應於



此處寂寞學無生佳句有云客夢無邊春草綠離魂一縷  
暮烟蒼幽洞草生惟自媚空山花落竟無言皆可味也

趙襄敏公大將軍忠襄公良棟之子也總督保定有西樓  
歷任封閉公命掃除夜靜秉燭觀書忽有人自窗入方巾  
朱履自認爲狐生員云居此百年公欲居此則宜遷避請  
限三日如見容則請扇鑰公笑曰爾爲狐安得稱生員曰  
羣狐每歲往泰山考試取其文理精通者爲生員可以修  
仙否則爲野狐公領之次日扇樓讓之泰山不獨司生死  
且司文衡矣狐試以文尤奇戲詠之云屏棄時文志早灰  
多年考試觸塵埃誰知此是登仙路岱嶽靈狐作秀才當

時黜落亦紛紛幾箇通才踏白雲漫說金丹成大道神明  
畢竟重斯文

姚合爲武功令作詩三十首荒涼寂寞而饒有雋味蜀中  
蒼溪縣亦僻邑書碩農攝篆有詩十首亦仿其意皆以淳  
矣蒼溪縣爲起句因明邑令沈國建坊題曰川北淳邑故  
也客云新春自邑中出行漸遠見門有貼春聯者帽有戴  
紅纓者以爲異則蒼溪之爲縣可知矣詩云淳矣蒼溪縣  
屏藩蜀北游亂峯趨劍閣一水帶巴州樂歲饒禾稼從風  
速置郵才疎幸無事訪古得夷猶淳矣蒼溪縣離堆映錦  
屏小錦屏山杜少陵書晨星魯國字顏魯公貶蓬州過蒼  
溪之離堆山摩崖記

事今不江雨少陵亭  
舊有放勝蹟留吾輩斯人緬舊型摩

崖碑孰續斑駁薜蘿青淳矣蒼溪縣環城面面山盤梯路

細卧水石灘頑夜靜時聞爐烟開早啓關到來今數月退

食竟蕭間淳矣蒼溪縣春深景轉慵消閒胥種樹請假役

歸農晴雨昇堂課雲烟出郭從幾番添簿領拄頰望高峯

淳矣蒼溪縣閭閻靜不譁民貧稀盜賊水急少魚蝦細雨

春聽鳥微陰曉看花方知中隱士游宦即為家淳矣蒼溪

縣偏隅別見春山高無曠土洞古有居民龍山古洞有龍

此犢青天外歸樵紫水濱紫溪水邇來三十載里黨人和

親淳矣蒼溪縣人多數代耕蜀自獻賊之後民多係遷來

而蒼溪有自元明迄今土著

揮鋤忙健婦賽社潔雛牲老未識官府居常遠市城青林  
紅葉裏草屋半巖橫淳矣蒼溪縣陰晴異冷喧母風吹壑  
轉地有公風母風皆甚大母風每起轉數日顛雨湧溝翻水蓄冬田足蠶收夏  
日溫叟童忘甲子卽此是桃源淳矣蒼溪縣書聲晝夜聞  
定知能學道若箇富多文事業千秋史功名五色雲鶴山  
占秀氣雅望屬同羣淳矣蒼溪縣公廷少訟爭敢期諸廢  
舉惟願眾心平補過知無術趨時恥苟營鴻飛泥暫印樸  
俗倍關情

甘肅隴西縣汪翕川來溪道光壬午經魁援例補授西陽  
州州判幼從乃兄盡菴學盡菴績學不售喜作詩翕川座

師陳蓮史先生繼昌亦盡臣知己也上蓮史先生詩有云  
棘院沈沈重門掩萬蟻酣戰爭奮勉藻鑑妍媸辨毫釐披  
榛採蘭勤妙選九月重陽望眼賒一騎塵飛夾道譁錦標  
共說新奪得一魁公然落吾家又上副主考吳云盡致賢  
才登第易空憑文字取人難可謂名言翁川計偕北上時  
與馬西園太史同行盡菴送之云不知離別苦慷慨唱驪  
歌風水同餐宿文章共切磋以君曾歷境期弟早登科奢  
望從茲始相思竟若何及翁川官蜀蜀人劉本清號東渠  
者爲隴西令以艱歸盡菴送以詩兼囑規勉其弟文章人  
已推前輩隴蜀原來是一家此去阿戎相晤語殷勤更囑

凜官邪東渠答云撫衷方寸慚懸鏡回首仙才憶浣花盡  
菴一號盡臣名藩太學生幼有神童之目題睡佛洞云想  
是山中無厯日徑把千秋當夜眠子彥昌號樸菴由增生  
捐縣丞分發來川翁川道光二十四年署清溪卒

近日少見詩僧間有流傳之作多蔬筍氣強作禪語更爲  
可鄙有僧雲空住榮之南禪寺閱其詩多可喜者求遠而  
失之近天下事往往如此摘其佳句錄之五言云山靈疑  
佛活僧懶抱雲眠水搜崖角瘦螺點佛頭青水靜游魚樂  
宵長病鶴饑僧瘦梅花骨歲寒松柏心看經魚食字聽偈  
鳥停聲風定數聲鐘梵音花外發胸中有洪爐萬物鑄成

句刻苦絕似賈島可入晚唐詩社中七言云山勢欲飛雲  
影亂松濤乍響雨聲催秋罨青山霜後秀風搜紅葉雨中  
飛霜催木落山爭出風抵潮平水逆流櫻桃花放家家雨  
楊柳村啼處處鶯山靈莫測烟雲幻地僻方知歲月長秋  
老白雲山影外詩成黃葉雨聲中囊空自補詩千首寺古  
誰敲月一扉客到有緣邀月醉僧歸無伴倩花扶深山不  
解春來未新種花開當厯看天地多情容我逸清閒獨富  
笑人忙僧今二十六歲俗姓白幼諷經至目連救母涕泣  
橫流發誓持血盆齋三載尋父至遠方足破流血迎歸葺  
茅棲之時時承歡所居山勢峭拔竹樹蓊鬱梵唄之餘焚

香靜坐其品亦可敬也

賴庭瓏內江人屢應童子試無成爲縣農書榮令許滙泉  
署內江時見其楷法清整令來榮膳稟啓滙泉歸里賴教  
讀餬口今年七十四矣無子以裝潢字畫爲業頗好吟咏  
憫其老而苦吟後將湮沒摘錄四首讀其詩可知其遇也  
亡妻未葬云舉案齊眉事已非宵寒時有夢魂依柩停古  
寺塵常滿客剩空衾淚暗揮何日九原封馬鬣當年五夜  
泣牛衣生前死後貧相累地下聞言應共歛和蕭大員先  
生還鄉原韻云太息湖南萬里程春風飛棹別江城飽看  
山水經三峽淡視功名誤一生蜀道鳥啼驚旅夢楚原草



緣動鄉情天涯豈謂無知己猶有勞人酒共傾感吟云年  
來事事與心違南北飄蓬失意歸宅賣貧無安硯地笥空  
典盡禦寒衣垂頭難壯衰年氣涉世何嫌俗客譏人到艱  
虞多失算從來傑士稱心希回鄉誌感云屈指離鄉四十  
年何期又對舊山川數椽老屋皆新主三徑芳鄰易昔賢  
猶予相逢橫白眼阿兄欲見隔黃泉歸來無限傷心事旅  
館孤燈祇自憐

余捧檄來川馬子琴以詩贈行云萬古蠶叢國王尊叱馭  
來新稱花縣宰有負木天才丙穴魚登饌郛筒酒滿杯文  
園貧病甚爲我訪琴臺

瞿唐連厓千丈奔流電激灘瀕堆當其口亂石排空自此  
入巫峽七百里中兩岸重岩疊嶂自非亭午夜分不見日  
月水漲放舟乘奔御風不能踰其疾也四弟薇堂見吾東  
來川貿易入川者云七舟銜尾而下遇險灘一舟爲販菰  
客聞喊聲未畢人船俱不見但浪翻藍色頃刻而散第二  
舟無事渠舟落崖下懸流自上飛落幸不入舟水手喧呼  
驚失魂魄及醒問舟已過灘否羣笑云離故處已遠矣吾  
邑曹大令佳和官雲南解銅入京經此舟將破跳身厓脚  
見舟已沉立處僅可容身後舟疾如飛鳥不能援手夜聞  
江濤汹湧猿聲淒戾終宵驚心動魄無復生望越明日從

人百計救之得出嗚乎險哉張衍懿詩有云兩厓如劍立  
百丈入雲牽石出疑無路雲開別有天何明禮詩有云峰  
與天關接舟從地窟行亂猿昏月色殘葉冷江聲非身歷  
不能寫出也

簡州施成澤字完志號一菴負耒之餘勤於誦讀醴蜜啖  
餅誤濡墨水不覺學問淹博通天文地理以拔貢官教諭  
鄉舉後丁艱服闋引見命爲文賦詩國初時異數也授  
陝西定安令運軍餉經日月山過星宿海斧冰煮飯堆糞  
作薪艱辛倍嘗陞湖廣衡州同知年已七十告歸白髮皤  
然口不絕吟詩文甚富劍門云雄關連百二巍峻逼岷峨

棧外三秦接雲間兩劍磨初經蜀道險頗見使星過戍卒  
無須設昇平人息戈塞外春思云兩度春秋歷塞邊平沙  
又見草芊芊清風拂面鬚眉老陽鳥辭人歲月遷故國鶯  
花來夢裏險途冰雪滿峯巔錦城何日重遊讌不見岷江  
又幾年

李維翰鑲黃旗漢軍康熙年間爲中江令善決獄署鄰水  
時夢一婦人遍體皆赤悲泣而前醒而思疑有冤獄果有  
李安坤報前夜李全用與妻甘氏不知誰殺往驗兩屍身  
無寸縷全用倒田間甘氏橫尸尸內無可追問夜又夢與  
狀元李蟠話舊意必有李姓者鳴冤蟠字之意訓屈也庭

訊間有李生國俊上堂大呼曰殺二人甘惟方也再問其故李若迷而復甦不記所云差往拘未至而惟方自入署云其姑甘氏之魂驅至在中江時夢至飯店見一婦衣黃巾覆其面手執一巾蹣跚而至驚覺謂黃爲正色加於女身服之不衷身之災也面爲巾覆其形難見蹣跚者舞也詩曰其既醉至屢舞僊僊婦人而舞醉若狂矣明晨王應甲之子具報其母何氏往范國卿家飲酒不歸訪求無踪又夢至飯店有豆一碟魚一尾旁有雛僧欲語未語方驚醒已將國卿之幼子名小和尚者逮至矣國卿猶然狡供率役往搜於河中得巾一方繼得鞋一隻未幾得何氏之

尸後身之衣反盃頭面遍體皆黃始悟前至飯店者飯與  
范同音豆礫者何氏徃范家借豆種故也魚在水者也鱸  
僧卽小和尚也非民瘼關心安得精神與神明通哉

古無韻書隨口吟諷天籟自鳴夫各操土音呼得如登以  
兄從姜因其俗之舊南北東西不能相強必齊之如同出  
一口拘矣更有協韻之說不知其本相通不待協也吾讀  
鬼詩而有異焉太和吳懋爲順慶通判歿于官久矣忽附  
箕題詩云辛苦一官竟隕身吾鄉猶有未招魂月明空傍  
寒鴉宿風冷徒依野樹吟百姓未能沾厚澤微軀何以答  
隆恩託君爲向同僚說誰把幽人記寸心胡廬山學使見

而悲之祀之名宦詩極淒惻特韻錯出不合格然古婦人  
孺子何嘗有韻本可據今韻並非沈約之舊雖以洪武天  
子之勢而不能改則以習慣而然耳

雪山在嘉裕關外者綿亘九千里高峯如琉璃插天隔蔽  
日月融化時流入黃河水爲泛溢四川雪山不一松潘大  
雪山卽蓬婆山嚴武詩更奪蓬婆雪外城是也茂州九頂  
山一名玉壘一名雪山積雪百餘丈所謂雪古自堯年是  
也按此卽隴山之首綿亘川陝尾拖洮州表二千餘里冰  
化雪消亦流入黃河流入江者更助汹涌之勢此宇中一  
大觀也冬日與同人爲詩會賦七古一篇我居山東近海

岱冬日雪飛瓊瑤碎我來西川不見雪炎煥滕六職疑廢  
誰知竒觀天下無萬里雪山亘絕塞禹跡不會到遐荒天  
限東西迷向背層冰突起凌九霄風霰積累自何代燭龍  
不照赤虬逃日輪行空到此礙六月炎天凍不銷縱披重  
裘寒不耐晴晝皎潔光射眸深夜晶瑩明不晦一白混天  
界華夷荆關妙手不能繪白銀宮闕起重重百萬玉龍蟠  
大塊天公作戲太顛狂穹窿欲塞乾坤內 聖朝拓疆二  
萬里包括西域圖經載士卒往返頻顧瞻結聚今昔每殊  
態却嫌諸峯狀多俗盡失白地抹青黛九頂玉壘亦竒絕  
峩峩積雪稱後輩雪汁融化灌岷江餘波猶得萬頃溉一



派分流入黃河水車鐵馬橫奔潰回顧天表仍嵯峨絲毫  
未滅鰲難戴金天肅殺得氣全作鎮西戎掃腥穢幾輩圍  
爐賦尖叉未極大觀馳域外瑤圃閬苑自人間祝融赫赫  
歛旌旆我自北土來炎方濡染大筆寫雄概

南充廩生劉德鈞字功亭學博澹亭族也喜爲詩冬杪卽  
事煖酒圍爐坐寒深雪正融鴉盤林樹黑燈映紙窗紅落  
葉山多雨霏霜澗有風垂簾常不捲萬物待晴烘嘉陵江  
卽目山作中流柱船爭上水灘江心鷗夢冷雨脚雁聲寒  
入峽穿雲易登天步月難臨風時眺望怒氣湧狂瀾暮春  
卽事底事蜂王報早衙一輪曉日透窻紗穿籬綠護公孫

竹繞砌紅開姊妹花梁上泥融簾入燕簷前風靜柳棲鴉  
留春無奈春將去愁聽田塍兩部蛙皆自得齋感事矻矻  
窮年嘆索居心情嬾漫竟何如嗜竒非好搜神記惡夢難  
求罵鬼書解語有花風雨落忘憂無草利名疎生平志願  
皆虛設磨劍期將習氣除嘉陵江上題壁一舟初至一舟  
開往返江干日幾回自是嘉陵好風景抱城山色壓船來  
水面風來一味涼不須避暑羨羲皇消閑試啟軒牕看綠  
樹青山雁兩行

楊時齋遇春歿證忠武平生戰績甚著待士卒有恩信臨  
敵當先胆畧過人嘗率數十人登山探敵虛實賊無數已

抵山下從行兵懼甚侯坦然令勿動故作疑兵日將暮大呼曰我楊鬍子也欲戰者來敵素聞威名終不敢犯徐徐引歸滑縣之變疾馳及軍經畧那公彥成引軍後至侯欲就營論事隔道口賊衆在此屯聚率勁卒八十人馳過賊出不意未動及回賊知兵少圍之數重極力衝殺無不一以當百潰圍而出查點少二人復殺入得二人屍以歸掘地脫衣埋之爲之洒淚賊不敢追躡以少擊衆往返如入無人之境殆古名將之比後一事載黎陽聞見錄福公總督四川時候侍鈴下偶與人坐吸烟爲人燒其袍破不能製新者暫歸福公素心器之瞻顧左右不見問曰某器宇

非久居人下者何連日不在側傳問以實告福公賞銀製衣補以馬糧時督標無缺借補提標後歸督轅賞雙分糧由此日起固由福公之知人亦鬼神使之因小故而蒙特獎今人遇小不如意事輒忿懣愚矣

楊煥章榮縣人有客述其春鶯詩云柳絲裊裊曉烟迷誰促流鶯上樹啼驚夢恐添征婦恨隨風飛過落花溪風致可玩留春絕句今日花光猶入座重門深鎖下簾鉤又芳菲莫遣隨流水景色宜人又幾時

曾彰泗字孔林原籍湖廣父遊蜀寄籍德陽舉孝廉孔林由選拔以知縣用分發陝西嘉慶十年署洋縣值兵變矢

以死守有勸以送家屬避兵者曰家屬去則人心搖誰與  
吾守時淫雨浹旬援兵不至八月朔賊衆蜂湧至自守大  
小西門指揮施放鎗炮賊已登城或掖之逃堅不肯於是  
見執呼曰吾縣官也殺吾無害百姓賊縛之城隍廟楹勸  
之曰公亦四川人若從吾卽不殺罵曰不遵王法不知天  
理四川安有爾等人賊怒澆以沸湯身手糜爛罵不絕口  
項中三刀脇中兩矛死有劉錫者原任華陽縣丞過洋共  
留守城見曾被執抽佩刀大呼曰狂賊敢爾奮力撲斫賊  
爭刺之受二矛傷自投文昌閣下濠內死事 聞均蒙卹  
典曾二僕韋升謝清從死家口得免

鹽亭張氏文學最盛孝廉名黼有子七人皆貢生長子力行字星源生子瑄順治辛卯副榜與子泰同科星源與一道人相善道人長鬚不言姓名人以長鬚仙人呼之臨別贈星源詩云湖海幾年無老鶴桃源今日有飛花元機紙上煙雲濕鍊藥爐中日月華美爾原爲三島客幸仙收入五雲家細思鎡下先天語漏洩人間草木芽遂不知所終

謝朝南號敬齋巴州諸生請書錦江書院冬寒擁絮朗誦達旦山長顧汝修息存彭端淑樂齋兩先生深器之累試不售倦於進取矣乾隆庚寅恩科時已七夕諸弟子酌酒

勸試志猶未決末座童子愀然曰先生此去平地一聲雷也雷適應聲而鳴者三共喜促裝兼程抵省考遺勿誤榜揭果列名嘉慶丁巳銓浙江龍遊令不務煩苛與民相安戊午甲子兩爲房考時稱得人以軍務積勞卒不能歸櫬士民助賻乃還葬予一鳴亦登嘉慶己卯賢書

榮縣西北有山聳拔特立曰牛峯共有五門除牛鼻外皆鑿懸崖而上別無徑可通昔人避亂立寨於此最爲險要榮邑諸生王石亭安宇嘗九日偕門生十二人登覽列爲十二景有詩百餘篇各體俱備錄其小詩四首牛峯峭徑云偶借牧童引徐上牛峯徑身聳古砦門一呼眾山應松

清徹霄云嶺上萬株松天高風歛起鉅聲引海濤湧入層  
空裏亮洞偷光云別有一洞天山光覩遠照平生恥穿鑿  
借以豁心竅連山小市云探幽意頗愜宛就茅亭宿挑鐙  
語夜闌鷄鳴亂山谷石亭嘗在華陽從潘紫垣學素好爲  
詩有秋吟十二首錄其七絕四首一洗煩囂氣爽然梧桐  
葉落竹浮烟巴山夜共平生話莫笑西南是漏天秋此身  
渾向廣寒遊良夜開簾正倚樓引領平羌江水上峨眉新  
展半輪秋秋惆悵烏啼月落時板橋人去欲何之懷人一  
夜蒹葭冷鏡裏相看上鬢絲秋霜片片芙蓉並菊開拒霜肯  
雨出塵埃花中後勁知多少冷處何人物色來秋花



華陽女高浣花號澣雪楊廷賢繼室二十八歲孀居嘗刊  
肉療夫紡績課子里中大疫一家無恙鄰人聞空中語曰  
勿犯節婦家好讀書淹貫史籍註有讀史評劄周易述解  
杜韓詩選註好吟咏有倦繡吟夫故後有鵲血餘草善古  
賦工詞能畫女子之多才藝者也梁山舟先生序其詩稱  
其雄渾清挺字字從性靈中流出無纖毫巾幗氣詩凡八  
百餘首自嫌以才爲累付諸火其子世燾搜得遺篇于道  
光丙午刻之澣雪夫人猶在也所居有竹隴石屋金粟巖  
王鐵夫夫人墨琴張船山夫人韻徵表姊古雪夫人爲之  
題額世燾癸卯秋闈卷落余房薦而不售今猶奮志攻苦

山舟先生作序時年九十三在嘉慶二十年距今三十餘  
年矣自白鹿磯至白螺山云十日滄江行連天但風色白  
浪舞空江千里斷行客今朝喜晴霽日影漏窗隙到眼白  
鹿磯岡巒乍奇特疎林聚荒翠餘雪一痕白陽陵磯名尤嶽  
寄江心露霜磧我從峽中來朝暮飲山碧觸耳駭灘流參  
天仰石壁造物洩靈秘勢已無餘力及此猶坡陀憑闌坐  
稍息漁磯亦可人前山轉蕭槭寄林韻徵云霜天噴澹雲  
氣頽西風颯颯草木摧空階敗葉擁作堆中腸如結勞徘徊  
徇嵩山鬱鬱高崔巍思美人兮山之隈拈毫酌酒銜金盃  
秋高豁目青陵臺黃河流水空灤澗使我對此腸九迴道

之云遠曷能來平沙漠漠驚鴻催何當新釀開春醅傾尊  
一笑心顏開登晴川閣同古雪外姊水天渺渺隱晴川放  
眼高樓興未闌山翠遙連帆影落江聲遠共荻光寒菩提  
掩映三千界碧玉迴環十二欄欲望瀟湘最深處模糊烟  
樹隔郎官夔州懷少陵潦倒徒懷灞上游老來詩筆遍夔  
州東屯秔稻三年熟西閣雲山萬里愁鷄柵水筒隨豎子  
短衣雄劍謁諸侯移家我亦成都客落日空登白帝樓清  
明云平隄柳色綻鷺黃何處看春不斷腸記取踏歌芳草  
路可憐時節菜花香寄外云幽蟲唧唧漏迢迢刀尺聲中  
又半宵欲撿衣笥尋舊樣秋來恐瘦沈郎腰

董繼叔字正誼昭化武生縣令吳天木勸之力學中康熙  
丁丑武進士選常州營守備雖武職有學識留心民事多  
條陳請于上官清盜源講荒政剔漕弊急城功著有非分  
集自以爲越俎之謀也楊大鶴極稱之爲之序亦武弁中  
錚錚者素工詩九日途次陝州云寥落行蹤未有涯愁添  
九日倍思家對花空自慚彭澤落帽無端笑孟嘉劔閣雲  
深秋欲暮輶筒酒熟路猶賒生平不減東籬興歸覓林泉  
學種瓜天木亦工詩弔費敬侯墓云辛勤窺魏復窺吳漢  
闕崔巍今已無殘碣依稀畱氏爵半隨春雨沒荒蕪  
碑云漢  
書令費公敬侯之墓天木字西山浙江嘉興人

楊時齋遇春原籍崇慶州武舉剿教匪以功致通侯人監  
稱之有李遇春者達縣武舉嘉慶元年徐天德倡亂遇春  
自備鹽糧率義勇千餘人隨營堵禦前後二十餘戰皆有  
功雷音鋪獲賊目先行王天福沙灘河擒僞軍師尹神仙  
剿方山教匪先後捉獲賊首張仲翔郭聯宗賞五品頂戴  
二年六月二十五日隨總兵朱射斗駐兵蓋地坪防冉文  
儔羅其清於儀隴廟伏發被擒賊仇之斷手足烹以大鑊  
至死罵不絕口丈夫不侯卽鼎烹立志早已超羣英爲國  
捐軀真人傑草野崛起屠長鯨李公遇春猛如虎身率義  
勇樹旗鼓惟威君恩衛社稷更念桑梓護鄉土怒馬長戟

萬人驚手提賊頭擲帥府有賊負勇敢當先如鷹擊兔血  
已濺有賊恃智運籌畧深入已捉活神仙大將朱公名射  
斗與公相須左右手朱公威名震敵營李公雄武得未有  
幕府載筆紀勲勞次第優賞溫語褒連營萬竈風摧帳斫  
敵三更血洗刀誓欲滅賊探虎穴鼓聲已死繡旗折將軍  
被縛如縛虎髮立衝冠怒背裂賊久銜恨前仇深手足俱  
斷但有舌赤體宛轉血模糊大聲罵賊胆氣粗生不殺賊  
死爲厲身入沸鼎猶喧呼事聞九重天爲泣縱食賊肉嗟  
何及三軍慘阻氣不揚戰馬哀嘶聲嗚咽丹詔煌煌卹典  
優上諭李遇春殺賊有功被賊戕害可憫交部忠節烈烈  
議照陣亡例加等議卹子鼎元現襲雲騎尉

壯千秋當日不死奇功立當與忠武同封侯

謂當國楊時齋

英雄

身歿留餘恨不盡長江咽怒流按李公與丹稜彭昭麟爲  
外兄弟其亡也彭有詩哀之惜短章未悉其死事之慘乃  
爲此篇詞雖不工要爲紀實

傅泰凝字葆初成都人戊寅孝廉善談論予鴻誥復舉甲  
午鄉試同北上俱下第留都中子病故葆初嗒焉若喪今  
業醫欲以濟人壽內云紅窗對影兩心知共閱浮生幾險  
夷偕子林泉甘隱匿逼人婚嫁費支持年來多故霜添髮  
眼底舒懷酒滿卮回憶昔時饒韻事畫眉風味正相思太  
息飛騰事已訛隨緣安分住岩阿羹湯供給貧家苦兒女

劬勞母氏多陌上鹿車同挽載宵中鐙火伴吟哦祝卿那  
藉東方肉親采花枝插髻螺獨坐云心迹蕭然靜似禪幅  
巾緩帶甚安便暗撩春思鶯啼外占斷新晴鵲噪邊簾押  
讓風排闥入柳陰庇犬藉花眠叩關恰喜無人到詩債消  
除又幾篇入山掃墓云淒絕入山路頻來又一年長懷風  
木感久廢蓼莪篇襍被遵周道春風泣杜鵑還應今夜月  
故傍壘頭圓慈母衣猶在披來展墓回已虛含哺願難副  
望兒賢黯黯啼烏樹荒荒宿草烟凱風吹不住似悵客言  
旋

丹稜李文簡肅作長編人皆服其史學而詩亦工妙與子



壁讀書巽山舊名龍鶴山有詩云已作平時鳥亂飛杜鵑  
更向阿誰歸似嫌住處猶城郭不解攜家上翠微楊升菴  
謂其詩絕有風味信然彭肇洙咏之云松柏厲寒霜仙李  
懷其質老檜不能侵指素盤根困野蔕一朝拔方隅千秋  
獨秉筆大業偕龍門於何涑水匹孝陵風雨來虬龍撼卷  
帙仰止厓追攀巽厓空嶠峯朱文公與其子善深敬文簡  
之爲人再三稱歎固不獨以文學著矣

樂至南硯山四面如削上有平臺中微窪宛如硯形繞植  
梅花古木新株漸成香海山足天池十數畝遍種荷花沈  
澹園太守登山探梅作詩云訪梅何必窮深山放腳一笑

開雲關清夢

已落翠羽

換古黛都作鸛眼斑或指紐成堆墨海

或云腰半如郎官宵深滴露凍呵水暖入蘸霞光流丹恍

疑花神索詩句泮妃踢天橫雕刻紫青大硯割雲出瀉以

香雪無渴乾銅坑鄧尉昔尋覓至今紙帳餘幽歡與卿俱

是江南客蛾眉山月來攜看西湖處士久不作縱可細嚼

枯搜難繞花未忍別花去苔文上衣生清寒安得顛米之

圖廣平賦潼川老守題名崖同刊尤秉元天池白蓮盛開

偕同人置酒池上天池之中開白蓮天池蓮種仙翁傳仙

翁種蓮去已久天池之水常泓然尋源近在硯山麓小橋

宛轉依山前泉流一半就淤塞誰復疏鑿開晴川我來蒔

花樂城下樂陽花發紛絲芊重尋蓮種繼遺蹟一池蓮葉  
生田田仙姿出水謝珊瑚飾冰肌玉骨清而妍風前珠瀉葉  
泛泛雨餘香放花娟娟官衙日永了公事納涼池上時盤  
旋臨流酌酒不知暮醉倒何妨石上眠山風振空月東出  
醒來疑在清虛天水流花開如有意清風明月原無邊傳  
與樂民共遊賞不須更問華陰仙

昭化南有百戶臺高不二丈下臨嘉陵江署令王維坤以  
年老乞休未得九日攜酒登臺賦詩云空衙日掩獨悲秋  
攜伴登高選勝遊幾點人烟隔樹窺萬山霽色入江流猛  
風冷月筵當散說劍談詩興未休便號此臺爲戲馬佳辰

良會共傳籌端陽荏苒又重陽猶自孤蹤守益昌兩地家  
園勞望眼千回江水似愁腸青山石上人須醉黃葉樽前  
月正涼任笑使君狂落帽壯年短髻已成霜立馬高臺望  
渺然秋深霽色正澄鮮官貧並缺陶潛菊將畧欣聞尉綬  
篇旋把茱萸添酒味何來北雁把書傳諸君盡是懷才客

同抱離騷一問天

坤維山西  
長垣人

葛嶠詩筆敏捷馳驟縱橫不爲律縛能手也遊雪峯山贈  
周鍊師陽才兼呈童曉東王立三云如遊仙境若登天勝  
地良辰夙有緣物豈山經傳得盡花非月令數能全雲霞  
朝日春風外鋸火間庭暮雨前可識萬般清意趣先生生

受許多年曲曲寒流抱寺東  
四維山色妙無窮  
神遊風月清  
虛外人在烟花景  
界中定水息波空  
作鑑深松交蓋翠  
成宮開懷隨處皆  
仙趣惟許孤高住  
遠公翠影重重木  
葉翻  
高人住處卽仙源  
蓮花長夏開金鏡  
桂子清空墜石根  
大暑深山常作雨  
廣寒終夜不扃門  
經年對爾添幽興  
莫與凡間世俗論  
方外雲遊上翠微  
八公難見意依依  
一庭有雨花先潤  
九月無風葉亦飛  
我往常山能益智  
人懷遠志不當歸  
大還聞說仙傳妙  
可許凡流識化機  
霜葉顏如二月花  
高巖盤曲道幽遐  
松心自愛依雲漢  
桂性應知泣露華  
山以無烟添夕翠  
天因將雨現朝霞  
興來更躡中峯

上不夜城南萬里沙繁華人不愛幽閒我愛斯人共往還  
竟日長言皆述古百年高會是登山身遊朗月清虛外心  
在行雲流水間爲問舊時同志者可能情性一般般名區  
自可常栖隱何故登尋往復來山意不教俗子住花心豈  
爲野人開諸公本抱風雲志獨我尤慚翰墨才正是高辰  
秋未老清遊竟日亦幽哉忽忽於今日月遷我今猶未得  
通元難窮義理五千字易老光陰半百年小謝城中無俗  
侶武陵源內有真仙不如托跡名山下多植奇花續後緣  
八首皆有一氣呵成之妙

溫江葛氏一門能詩自秉敬以來子曰芸曰荃皆以文學

著後荃孫岷岷子士麟與昆弟輩能繩武初籍新津後遷  
溫江新津修覺山寶資山雪峯山峯巒綿亘實爲一山有  
紀勝亭蘇穎濱嘗題詩遂爲一邑勝地一日希陵士麟東  
谷士聳晴帆士精遊紀勝亭皆題詩用蘇子由韻東谷云  
火雲蒸暑布遙空山色江光在眼中石徑半遮黃葛樹名曰

磬聲遙送白蘋風題詩客擬畱丹碣載酒人爭倒碧筒太  
息徐君修葺後伊誰踵事更如公希陵云層巒疊嶂接遙  
空遺碣荒涼落照中草沒苔痕迷屐齒雲封村樹靜江風  
漁舟隱約如飄葉佳句推敲欲貯筒偶一登臨寄笑傲不  
徒惆悵憶蘇公晴帆云素喜登臨類遠空欣逢勝地武陽

中三江合派翻長浪一塔高撐鎮野風羽客當簷傳古瓦  
漁人依岸理殘筒尋涼大得清幽趣漫說斯遊學次公各  
門清新一時杯茗吟咏之樂在一家爲難也

楊宏斗字占鰲樂至人性英爽跳盪不羈乾隆間征與義  
傑匪出應募翼長奇其勇每戰當先袒呼貫陣以功得千  
夫長母老歸養嘉慶五年教匪冉添元倡亂太平人民不  
知兵聞風奔潰占鰲怒跳而起築保安砦以置婦孺聞賊  
至率健兒數十騎伏五臺山側賊出不意驟起搏戰占鰲  
奮勇連斬三賊首眾驚遁遂不敢犯永興場冠害旣除灌  
園種花猶時彎弓作霹靂聲仰天大笑人莫測也陸放翁



詩云閉門種菜英雄老可勝太息

安縣浮山亦名羅浮十二峯峭拔突起平地石骨嵌空露  
出故曰浮山雖未甚高蔚然深秀顧稷掌教汶江書院屢  
遊作詩和戴山浮山得句詩云吾聞羅浮山環海幻明晦  
窈然深秀中恍惚山靈在霧夕與霞朝清泉瀉無埭無乃  
此耳孫標奇井絡內招提隱其懷杉檜植其背訪勝不言  
疲望氣先可愛馬蹄屢蹙蹙石墩久敗廢斷木短行橫危  
亭陟岩載梵唄宣淫槃優鉢輕鼎鼎琳宮創何年殘碣詞  
若愜妙相花霏霏齋鍾僧對對層樓拔須彌彭門失伍隊  
霄漢逼檻檻天風響環珮自性本空明孽根生覈黷嗟哉

墮地緣安往豁無礙精搖著霜鐸慾填無量歲轉蓬判西  
東維谷紆進退有臺擬凌虛拾級步礧礧題名者誰何崔  
顥屬行輩人隨黃鶴返壁若畫塼繪白雲仍悠悠佳境遺  
疵類告饑括香積沙彌剝聚代檐前快羅列千峯獻螺黛  
雖乏巨浸觀煙雲差無倍詩成八詠後錦字亦星碎又有  
次吳惜楓登浮山原韻詩云平生好遊覽芒屨不厭穿浮  
山名耳熟圖畫本天然未歷此山勝那識山路平花香與  
鳥語處處呈鮮妍鞍馬素未習策蹇心悄悄幸藉羣從力  
得以無恙焉莊嚴敬頂禮卽此可悟禪蒼松皆盤曲古柏  
亦蜿蜒七層樓之右望鄉在其巔風塵廿餘載不覺念慮

獨因知人事拙不若還我天昔傳幽風什獻羔并獻豨昨  
過華陽道上有十丈蓮區區名勝地彷彿遊琴泉有石更  
峭拔虛處疑若懸藤蘿紛上下疎密相糾纏仰觀天際白  
太虛過雲煙俯視竹木合氣象真萬千水利民所賴百道  
羅山前春耕飽甘雨行處皆良田慚余爲民牧當更籌安  
便凜若馭六馬惕若臨深淵欲觀苗或或先除草芊芊所  
寶非異物蘭芷與蓀荃禍機不可伏積念敦福緣公餘每  
三省忠孝身率先學書苦無暇有紙如廢箋自愧不努力  
何以埒前賢願民各自愛莫負大有年

劉樸齋炯順天大興人前任成都升資州知州後知成都

府桂燕山制府在川爲方伯時議修燕魯公所未就繼吾  
東劉王坡先生來蜀旬宣之餘視公所功猶未畢復捐廉  
倡諸同鄉成其舉時爲道光乙亥修築已五年矣督其役  
者卽樸齋弟端號石麓亦宰成都後升忠州樸齋始之石  
麓終之先後皆官成都雖非一人之力不可謂非異事也  
樸齋政事明敏亦擅風雅在資州多留題古渡春波云東  
風吹春來絲皺大江水粼粼鴨萬頭掀然勢如此兩岸竟  
中斷一葉疾于矢普渡往來人印須喚舟子鳬鷺避遠灘  
春鋤立沙沚到眼慈航存彼岸近尺咫豈學子產輿濟人  
向溱洧實至名自孚小惠殊可鄙鴛鴦六十一古堰今則

圯安得疏鑿興坐令黔黎喜浩蕩從東流挹注無時已笑  
指碧波中飄出桃花蘂盤峯暮雨云截臬上無際參天一  
峯獨不肯宮小山厚地嫌窘戚廉纖屏翳來翠滴層崖綠  
螺髻何窈窕粧飾著新沐夕陽忽西沉底事金烏速暮色  
與山光蒼然紛滿目足音盤之中聽楚憶空谷散絲偏連  
綿頗饜農民欲何如溥甘霖遍灑大千曲一邱一壑間膏  
澤未云沃歸鴈濕更飛投林向何宿遙望翠微巔疏鐙出  
茅屋北田秋風云一綫太逼仄确磬爲樊籠豁然見平曠  
塍疇交相通是時萬寶成玉粒搖金風黃雲壓隴斷不辨  
西與東我來牧是邦憫茲山澤農朝夕盡腴庶所望秔稻

豐瘠壤多梯田未易膏腴逢御風冷然善穠稔千家同今  
秋大有年好語聞老翁絮絮前致詞感荷使君功使君有  
何功長養乃天公持此謝我民兼以慰私衷醺壇雲梯云  
石骨撐突兀絕頂窮攀躋七十有二級曲意懸丹梯眾山  
小坏垤羅列何敢齊世人紛若蟻脚底相排擠呼吸帝座  
通帝鑒乃在斯聞有古仙人鍊藥茲山陞還丹足九轉稽  
首陳青詞一朝羽化去留此不朽基振衣登崇岡浩浩天  
風吹李阿倘可逢再拜真吾師授我不死訣永與長生期  
飛昇大羅天不受紅塵迷

岳池楊千蕃號華祝性嗜書家貧聞異書多方購之手不

釋卷室無儲粟泊如也拾遺金俟於路有號呼而來者問  
知輸賦所須急還之嘗遊黔雨中獨宿孤舟夜半有兩虎  
咆哮岸側祝曰吾爲探親而來苟非數盡毋怖我俄聞蹶  
逐聲晨視虎跡縱橫杳無人蹤終因棘闥在渝教授渝有  
狂生負才傲物相與論辨輒爲所屈因贈以詩有云叩來  
當是五經笥腹內便便發以時又云爲之儼作方山傳瞠  
乎筆力遜子瞻其爲人傾服如此晚年嚴于課子長男縉  
季男昂康熙甲午同登賢書昂廣東增城知縣縉官教諭  
皆能詩邑西有宋狀元蒲信讀書處在石聖山縉題詩云  
讀書臺畔剌香芸石上畱題仰止殷

石壁刻狀元臺帶草依山猶

漲綠池龍待雨欲乘雲潛修丙夜鷄能語奮翮天衢鶴不  
羣此日芳縱誰繼武佇看星斗煥斯文昂詩云五百名中  
冠一軍書臺人遠地猶芬池餘墨浪龍鱗縉山起烟嵐鳳  
羽分傍城三峯聳時漏夜寒光星指斗衝霄瑞氣海連雲  
徘徊故址芳蹤杳江碧山青絢至文觀詩皆自命不凡宜  
聯鑣文闥並驅爭先也

周我東歿久矣檢故紙忽得其和趙竹菴詩五首卽步其  
韻秀麗芊綿似少年得志之所作孰知爲窮途羈旅之人  
耶又孰知其爲方剛玉折之人耶散失之餘急爲錄之陰  
雨探梅云雨過春光潑翠新水流清淺淨無塵偶從村店



尋紅友忽倚溪橋對美人得有餘閒聊索笑能消清福不

嫌貧卅年回首孤山路風雪漫天獨問津

癸酉冬曾冒雪游孤山迄今及

三十二僊菴云曾經着屐尋仙蹟殿閣閑看夕照紅長笛

聲中多歲月黃梁夢裡幾英雄元機悟徹窮通理道妙思

參造化工世事浮雲身過客何須爪印效泥鴻踏青雲鶯

聲似報踏青期結伴尋芳莫更遲十里花酣春態豔千條

柳綰別情凝平原草綠嘶金勒短棹風和唱竹枝慚愧天

涯頻作客家山辜負未歸時春雨云小樓終夜作繁聲點

點清圓入夢輕舍外水添鷗浪濶林端錦濯杏花明看耕

綠野春陰淺憶話巴山舊恨生正值釀花天欲暖鳴鳩喚

出日初晴海棠花下小飲云海棠溪上雨如煙憶別羣芳

候五年

海棠煙雨爲吾鄉八景之一今別已五年矣

白戰有慚春豔豔紅妝偏

覺韻仙仙酒澆魂壩人宜醉景寫繁華筆自妍笑我詩成

書却懶墨淋漓處倩張顛

余不善作字詩成多倩信侯書

溫江李某有檀樹蟻穴其中析爲薪木有文曰溫江正堂

加三級字體古雅似漢隸背面則反文絕非人力所爲時

在道光甲辰九月獻于邑令攝篆者爲全椒江菱石錫麒

先是盜賊肆劫掠其魁名蔡璜大憲索之急逃往宜賓菱

石遣幹役躡蹤獲之部議果加三級文到縣亦以九月人

以爲竒江君藏木于匣徵詩成集多頌祥瑞竊謂居官加

級恒事耳彼領兵武弁鄰封州縣及讞局諸君藉是役升  
擢換頂賞翎給儘先者不一人何不先爲之兆特以加級  
爲江君瑞耶是木之文非成于一朝以此見人生得尺得  
寸皆有一定兆見于此其不爲之兆者冥冥中亦預爲定  
無庸欣戚于其間也擇詩尤雅者錄之成都吳鈞云棧樸  
菁我世文明治道昌 聖人隆 壽考令宰著循良皖水  
多翹楚椒山挺豫樟傳家徵筆夢濟世發書香貢樹成均  
擢瓊枝 秘閣光錦江鳬駐舄玉壘鳳鳴岡儒雅師文黨  
風流慕武鄉政成三月最化洽萬春長偶爾荏苒警幾遭  
薏苡傷妙謀心腹運幹役爪牙張庾亮登樓日涪翁遠宦

方網羅收鼠兔微纏繫豺狼衢巷觀如堵閭閻喜欲狂動  
容傾大府交剡列飛章花縣仁恩溢檀林協氣讓穴居來  
慕蟻德產致祥桑壁判三遷字珠聯七寶裝逼真秦篆隸  
不數晉鍾王持獻芻蕘叟傳觀翰墨場鴻文昭撰記鸞囀  
叶膺廳處士曾竿濫賢侯復幣將

余時就聘萬春來歲仍訂講席

居然歌

適館何以慰承筐勉效巴歛曲聊稱華祝觴雙旌應作守

楓陞姓名揚張之培詩云廿四循良品來從皖水濱學

先優秘閣材早貢成均玉殿彤雲靄金臺化雨勻魚鳧

初作令鸞鳳暫栖身鸞續傳歌日牛刀奏泮甸寸心明似  
鏡尺澤沛如春賣劍風丕變鳴琴俗漸淳黠黷梁偶跳薏

荻謗何頻盤錯逢虞詡才猷仗冠恂豺狼窮藪澤道路剪  
荆榛鴻集心初定魚歌尾不辛疏名榮北闕受福讓西  
鄰瑞兆羶來慕祥符雉亦馴筆花畱鳥篆文木認龍鱗蝶  
夢三刀幻蟬聯七字眞野人芹共獻長吏璧同珍倚馬曾  
書記雕蟲漫效顰甘棠他日思永遠頌深仁刑書楊榮之  
作七古頗爽朗詩云我公蒞任湍水濱四境環歌有腳春  
我公政治彷彿召伯邑人共被汪洋澤我公仁民兼愛物莫  
不視若重生佛我公文臣不愛錢清風兩袖樂陶然昆蟲  
草木有何知三遷預報良有司刊成字跡通文翰聞者爭  
獻祥符讀或詞或賦或詩歌各逞辯口如懸河愧我獨爲

刀筆吏絕無孚甲新生意公餘每自索枯腸擬將瑞木比  
甘棠甘棠遺愛詠於詩瑞木重教繫我思腹不便便才力  
淺敢向大雅來數典古有蟲食木篆字以此較之無稍異  
又有音槐與腹松盛事千秋重繼蹤元駒不向楹中匿試  
問七字因何刻爲公克展濟世才渠魁獲自異鄉來天使  
我公除民害有功不伐功愈大古來循吏公不讓永作千  
秋宰官樣

昭化張憲齡云其祖有名爵者在明時應襲世職棄官隱  
仙人峯下自號仙峯道人棲朝陽洞講修養之術鑄道人  
像于石自爲之贊有詩集二卷兵火後無存記其寫懷二

絕云歸隱清風一葉舟五湖烟月任遨遊但將酩酊忘身累不記人間春與秋虹作絲綸月作鈞天星爲餌斗爲舟雲裳製就脫蓑笠釣取銀河一片秋

四川鼎甲甚少國初遂寧李仙根以榜眼及第官至戶部侍郎其父名實字如石進士明季爲吳縣令多善政鼎革後寓居舊治盜賊蜂起環居里許賊樹幟曰敢犯李令君者死有馬生舟行被盜生曰我李令君戚也賊還所掠別具一舟送之其感人如是隱居三十年子貴後布袍角巾如未有祿養者年八十乃卒著有蜀語未傳其詩有云飄零白下家重破痛哭青雲夢已殘新亭淚洒庚申歲彭澤

詩編甲子年家國滄桑黍離之感深矣

朱青樵孝廉海鹽人爲吾東平陰令小髯之父也小髯名  
光昭教匪之亂効力軍營以議叙得典史娶榮昌敖氏閨  
閣皆通風雅生子右賢從外氏姓入籍中進士爲黥令升  
州牧小髯詩名久著以典史終著有蛩吟小草贈林戟門  
一篇足當自叙冀北自古無良馬騏驎伏櫪作喑啞忽然  
仰首一鳴號相詫伯樂其來也五十功名嗟數竒風塵淪  
落深自悲臣不如人今老矣請將少時述君知少時意氣  
凌星斗才短慙非作賦手悲哉髫齡喪椿萱橐筆萬里鷺  
叢走朝登泰山巔暮渡黃河口狂興欲將邱壑吞滿胸捫



來頗覺此腹不相負斯時流寇擾川中烽烟相望民舍空  
班生忽投毛錐起阿誰馬上是英雄亂峯入雲猿鳥絕渴  
飲清泉飢齧雪朔風撲面寒似刀炎氣炙膚汗淋血倦來  
曲肱地下眠忽驚金鼓震連天不辨人影迷烟霧流血奔  
擊江濤怒十載功成報捷時策勛叙績奏丹墀小臣也  
得邀恩賚簿尉於今笑儂癡歸去重理殘書卷開函如  
見故人面詩客把臂入騷壇花下月前來酣戰憑弔古今  
感盛衰幾眉巫峽閒踏遍冷眼閱盡事不平拈取風月筆  
底就烹鍊酒酣斫地發狂歌豪氣逼霄風雲變宦海浮沉  
三十年臣朔飢欲死誰憐才拙原合遭俗忌家貧深悔因

名牽嶙嶙瘦骨窮益傲客無能今客無好本來面目猶故

吾醫懶無方甘蒙誚生平枉作送窮文應識鬼亦挪揄笑

去年得與賢宰親

謂萬次榆明府

常將青眼盼朱雲張來廣厦遮

寒士爲道世更有林君君乃八閩之奇士少提南宮宰百

里載道萬戶口皆碑鳴琴一官心似水况復襟懷迥超塵

鮑叔能知夷吾貧愛才若渴肝膽照汝胡交臂失斯人我

聞此語忽覺睂飛而色起伯牙復生鍾期不死得一同心

喜不已紛紛然諾空多人更從何處覓知己舉觴狂嘯望

蒼穹天既生我豈終窮君不見干將莫邪兩神劍不藉風

雨自化龍喜得家五叔春帆書骨肉悲遙隔分飛闊十年

堪憐兩地淚只藉一書傳風雨燈前字鄉關夢裏緣何時  
重聚首北望倍懷然贈董樸園明府宦跡十年繫詩編一  
寸餘家傳漢儒策宅近聖人居政善民何訟囊空架有書  
幸從良吏後學步尙趙趙南充感興極目遙山烟霧開登  
樓遐眺意徘徊譙周何必談天數陳壽偏能負史才碁局  
乘除人事改壯懷落拓髣髴毛催憑欄祇覺增惻悵薄暮城  
頭鼓角哀偶探爽氣上西山昔有仙人謝自然古洞白雲  
緩嘯雨滿林黃葉雁連天荒村樹老寒霜橘秋水波平夜  
月船多少人家居負郭濛濛遙望起炊烟

蒟醬張騫至西南夷食之而美擅名蜀中久矣來川物色

不得問土人無知者家人買黑豆腐蓋村間所種俗名茱  
芋實蒟蒻也形如芋而大可作腐色黑有別味未及豆腐  
之滑膩蒟蒻一名鬼頭作腐時人多語則味澁或云多語  
則作之不成乃知蒟醬卽此俗間日用而不知可笑也遙  
攜饒口入西川蒟醬曾聞自漢年腐已難堪兼色黑虛名  
應共笑張騫茱芋亦名黑芋生食之口麻

高伯鵬遠程同里戚誼也自漢口溯江而上來榮相視留  
別二律云依然儒素舊風流十載巴渝歷數州宦味淡如  
雲過眼苦吟贏得雪盈頭間邀詩伯窮騷雅坐擁芸編自  
校讐歸去莫羞囊底澀川中人物已全收斗米何須怨拊

腰以官爲隱亦逍遙隨身賸有書千卷助興聊憑酒一瓢  
花落訟庭消雀角雨餘春社聽民謠浮名不必當時羨遺  
愛應知去後標伯鵬將歸往嘉定謁郡伯蓮溪先生先生  
招飲贈路費焉

傳云劉綬隨父來蜀至中江貧窮乃至成都投軍營天尙  
早輟門側假寐帥夢一虎卧于門驚醒使人視之則綬也  
收之漸至大將按劉將軍隨父征興文都蠻父已官總鎮  
幼貧之說似不足信劉大刀之名聞天下更善袖箭以墨  
汁亂洒板扉射之俱中技勇絕人張維斗拜劉征東畫像  
云將軍原不死沉鷺肯膚撓矢折渾河暗旗翻雲漢高一

杯存碧血百戰洒丹毫征播威名在今猶說大刀艇工詩  
曾題佛圖關云當年先業樹蠶叢奕葉何堪振父風自信  
承家慚長子敢云報國紹元戎兒童舊頌平蠻績父老新  
傳勦播功武烈謬叨綿世澤孤忠一脈貫長虹東逐西馳  
歲又深凱旋駐馬漫開襟三巴兵革龍泉迴六月烽烟鴈  
字沉關塞自惟憐白髮廟廊誰爲報丹心良弓烏盡應無  
用緩整魚竿釣海濤

傅泰儀字鳳岡成都人屢薦不售癸卯科卷落余房亦薦  
而不中茲以歲貢生註銓訓導喜爲詩讀紫燕釵記霍王  
舊養如花女小小娉婷藏繡戶傾城顏色世無雙孤鸞未

定鴛鴦譜一朝失怙結酸辛柳絮楊花恨此身題詩未敢  
裁桐葉豈向標梅怨不辰年來年去住金屋隨娘轉側度  
芳春翩翩公子君虞者負性雄豪本風雅關心曲裏鳳求  
凰那羨玉堂馳車馬訪訊名花繞素懷非因野草游絲惹  
元夕張燈月滿街士女紛紛踏繡鞋憐香心事兩相印人  
海中間拾墜釵未必便成金釧合已似溫家玉鏡臺蜂媒  
付託鮑四娘領願霍母許紅妝玉笙象管迎秦娥蕭史初  
欣跨鳳凰從今魚水結綢繆妝台笑對巧風流看花曲徑  
同攜手賞月香肩并倚樓交頸曾教雙鴛妒關雎不羨咏  
河洲洞房已遂男兒願蓬戶終教女子羞春闈大比開皇

都豹變爭將賢士趨。羣雲競看屠龍手。畫錦歸來好丈夫。  
匆匆邊塞環甲起。連綿烽火何時已。有詔參軍往玉門。陰  
謀意外來奸宄。此時紅袖正相依。那認鴛鴦兩背飛。滿酌  
陽關一樽酒。宛轉河梁折柳枝。蕭蕭班馬青山暮。獵獵旌  
旗滿落暉。欲轉鶯聲叙別離。未言玉筯交橫頤。妾心靡他  
貫金石。願言偕老不相違。白日當天心昭昭。豈教詩人刺  
氓蚩。蹉跎玉聰留不得。人影衣香從此辭。送遠望窮天盡  
處。愁鎖眉峯轉翠帷。歲華冉冉忽三秋。錦字音書未見投。  
卻寄銀屏傳消息。萍踪又豁孟門眸。屏中展轉何所語。丹  
靑畫盡邊城苦。朔風邊月蘆管聲。征客思鄉淚如雨。跳梁



小醜就芟夷。大尉還都捲戰旗。憑勢特敝招賢館。擇壻頻  
將駿馬羈。紅線依依邀舊雨。東床打疊訂佳期。提防不放  
舊家信。垂情先笑婦翁癡。可憐玉貌思芳訊。淋淋淚雨雙  
蓬鬢。知是盧門是孟門。燕語呢喃無準信。爾來家事漸蕭  
索。幾番瓦卦金錢卜。賂遣親友構錦鱗。錦裙羅衫都典卻。  
嗷嗷病損春山威。膏沐全拋罷梳掠。青鸞渺渺竟不回。數  
盡飛鴻願屢錯。紫釵抽下雲鬟外。幾年珍重稱心快。青蛾  
可償相思債。侍兒袖向街頭賣。春風蕭寺牡丹開。醉俠相  
邀結伴來。聞說妒花風雨惡。路人傳語爲徘徊。黃衫豪士  
二毛蒼。飛鷹挾彈獵千塲。難聽紅銷兼綠慘。快刀欲砍負

心郎何知白挺隨兵校太阿如水摩秋霜挾持嬌壻來放  
院風光重認勝業坊不須猶豫鞋兒夢乞漿還汝舊裝航  
燕去燕來幾經年釵還釧合慰纏綿頻教薄幸青樓客又  
得鸞膠續斷絃門楣此日重回首斬新喜氣勝從前蛛網  
妝簾勤拂掃對鏡重開並蒂蓮遙憶簫聲台卮日春風浪  
度負嬋娟連年鹿鹿沙塲夢一樣相思兩地懸燕壘苦將  
新主托鴛盟緊守舊時緣支離病骨得重甦分明不是夢  
中憐聚首華堂問絮語天上今宵月又圓鍾雨春見和牡  
丹兩絕戲用長句荅之主人愛花如性命只緣臭味與相  
近前身應是賣花翁合佩司花香尉印清晨徐步傍花畔

亂撲蝶蜂麾不散忽看牡丹微破綻晴日漸烘紅爛爛此時梅蘭香氣空桃花零落梨花亂彩雲欲散意還畱羣鶯有情啼不斷東皇故故矜化工妝成蓋世春風面天孫霞帔雲錦裳初自璇宮組織遍王母侍從競繽紛豔光奪人心目眩嬌酣髣髴中宿醒應是瑤池陪清醺千層葉蕩琉璃影幾枝風亞珊瑚顛可奈騷經不撫收燕子狂噴黃鸝怨鍾期彩筆傳夢中要與詩人補遺恨從今不唱懊儂歌高張錦幄與羅幔繁華世界一大觀置酒邀君來同看明四川副使劉天民號涵山吾東歷城人詩名甚著過富村驛有詩云搖落山中驛頽籬出野花飛飛翻麥燕緩緩

集林鴉斥鹵分青井荒莎傍白沙貧民猶夜警未忍聽昏  
笳過某畱別效庾信體江漢邁遐軌川巴迴故轅周覽更  
竒葩花石燦以繁種種生懽悰蕭蕭揚旅魂思歸占舊引  
撫物憑華軒皇役今祇承遠道將駿奔部曲擁墨綬餞晏  
羅青尊豈不念同袍所性在邱園誰能識此意無乃龐鹿  
門田山薑侍郎稱先生詩雅潔於今爲廣陵散矣

乾隆初巴州廩生王同善授徒于東鄰之側一日東鄰招  
飲醉歸過古墓忽見二人以禮相迎延之入座東鄰婦望  
見大呼生如夢醒歸館是夜夢二人投詩云天寶元年住  
此間千秋何幸接君顏一場好事陰人破欲覓先生再見

難醒而不忘酬以詩焚之墓前詩云憶昨孤遊到此間蒙  
君雅愛苦相攀偶因日暮歸家急未獲登筵一霎還鬼固  
不俗生亦多情之甚

金堂劉崑陵字蘊珊好爲詩海疆用兵投効軍營在浙目  
擊時事感慨憤激發而爲詩皆有爲也傳其四首終身難

報九重恩匹馬匆匆走郭門孤掌竟成千古恨烟波渺渺

弔忠魂謂裕  
總制銀符寶鉞賜瑤京大將堂堂萬里征太息生

靈塗炭久安排一鼓復三城謂奕大  
將軍千門萬戶夜焚香憂

國憂民髯已霜一木中流難作柱大臣原不愧封疆謂巡撫劉

公韻降幡眞否豎船頭凱唱南天值九秋我亦箭痕癢尙

在無功安得覓封侯在營得六品頂戴軍務藏事流連西  
湖贈妓許素馨云西湖風月久關情兩載勞勞愧請纓昨  
日鳳山門下過始知人世有飛瓊芙蓉出水好風神慧質  
靈心不染塵脫盡桃花輕薄樣擬將天竺問前身素馨亦  
能詩贈劉云腰橫三尺酒微醺颯爽英姿氣薄雲好待封  
侯歸去日桃花馬下拜將軍

資州朱泗林雄毅有勇畧能舞百觔大刀獻賊之亂聚族  
黨千餘人于州西之朱家營四方避難者多歸之士賊數  
百欲犯其壘泗林挾巨牛入小溪洗刷再四從容復回持  
刀向賊賊相顧驚愕日暮視賊眾將懈率眾突之賊驚潰

斬首數百餘竄去自是每戰皆捷無敢窺者

明皇幸蜀至白衛嶺咏李嶠詩歎爲才子嶺在昭化董照  
詩云雲橫衛嶺路幽遐鳳輦來時拂翠華恨是垂楊歸碧  
落翩然仙李入烟霞丹邱有路尋靈藥野草無情絆落花  
宮女偏歌汾水曲千秋墮淚感榮華

冷磧關在峨邊廳南十里兩岸峭壁東南限以長江萬峯  
插天中通一線由關出卡卽赤夷地界山陰楊國棟嘉慶  
十八年來攝篆宿冷磧關聞泉作詩云夜聲何處石泉鳴  
冷磧風高夢易醒一枕曉寒山月落細聽疑是隴頭聲  
攝篆鄧都登平都觀閣上懸聯云以遨以遊得仙人之舊

館一觴一咏極天下之大觀深受其詞視欵題瞿頡退考  
縣志則所修也瞿號菊亭明季大學士忠宣公式耜之後  
忠宣殉節廣西 國朝以其盡忠于明全其家室菊亭譜  
鶴歸詞表揚先烈以孝廉謁選宰鄧都及仁壽著有宜南  
坊草秋水吟詩集秋夜卽事云四壁留孤影蕭然似老僧  
濕螢時入戶飢鼠屢窺燈不作還鄉夢空思耐久朋明朝  
青鏡裏千點雪應增落葉云一夕霜風起蕭蕭木葉輕打  
窗疑雪片捲地作秋聲鼃冷添薪富庭空放月明此時感  
搖落不獨長年驚汚縣謁諸葛丞相祠定軍鎧火燭天紅  
駭賊依然討賊忠 教匪至河見定軍山鎧火無數疑是官  
兵遁去事聞賜帑金修祠並賜扁額



人品獨高三代後表文堪置六經中石琴一曲吟梁甫  
奎藻千秋耀闕宮五文原前經故壘英雄揮涕古今同曉  
發鳳縣云曉跨征鞍出鳳城絮袍遺怯早涼生哀猿叫月  
如三峽秋蟬吟風恰五更路入陳倉從古險人來雲棧只  
宜晴馬蹄得得虺隤甚但聽西風振策聲春柳東風一夜  
到江濱抽遍長條一色新小逞風流牽別恨未堪攀折贈  
行人畫橋瘦影憐初月灞岸輕寒怯早春何處愁來情脉  
脉傍檐臨檻總長顰花影總是瑤臺幻裏身好憑月姊爲  
傳神過牆依約離魂女映水分明對鏡人幾度呼童常誤  
掃便教貼地不成茵賺他癡蝶情無限樹底渾疑別有春

制藝英聲選菊亭文亦能手

余署新津聞岳調陽博學能文家素饒性嗜書一讀輒記  
三中副車不得鄉舉人錄其文往往得售至書肆買書不  
較值水田百畝皆爲置書鬻盡曠然不以爲意晚年並無  
棲止置破船板支岸上排比爲牆架板爲頂客至止一椅  
僅三脚其一壘石墊之談笑自若不知其爲貧也修金或  
得二三百兩門生故舊有以窘乏告者隨手分給不少吝  
氣味不相投雖瓶無隔宿糧以重金聘之不往所置書攜  
至相識家閱畢置書卽行或告以所存某書應送還辭曰  
俟吾修屋後來取其實營建無日也古人謂舟居非水陸

居無屋岳君殆其人乎善談文諸及門相依以錢米致其家亦不問或華衣無卽撝敝袍妻子亦無怨懟陶令兒郎諸葛妻一門皞皞有太古之遺風焉

粵西陳榕門先生宏謨爲本朝理學名臣鄉試時闈卷房考已屏棄主考朱曙孫搜落卷得之大喜遂中元官至大學士後有名繼昌者爲吾東盧南石協揆取中會元遂爲本朝三元之一現官布政兩公爲國得人不負使命如此朱字景先溫江人康熙癸巳進士官終太常寺卿

眉州白龍池四山環繞久旱不涸明尹戶部覺題云白龍池外清涼寺林影波光翠黛濃張吏部廷云白龍池在眉

山麓好景宜人分外濃吾東厯城王雲芝先生敕龍湫印  
月一泓澈底古靈湫秋月長年浸碧流玉鑑橫空金氣爽  
冰刀剪水露華浮分毫塵垢渾無染上下天光自是幽清  
趣許多有誰識主人心鏡恰相投登我道里記云峩眉山  
下有龍池按我眉縣西有龍池四山環抱瀾漫數里池心  
突擁一峯秀削類江南燕子磯山上多奇花異木有名觀  
音蓮者正黃形如蓮瓣重臺經年不謝池水深黝相傳下  
爲龍居有大金鯉魚四尾及水獸等物土人多於中網魚  
舟不敢近池心近則波濤驟湧風浪交作每風日晴霄或  
星月清浪羣山倒影參差有若圖繪春夏之交人多攜酒

泛舟爲遊賞計焉

瞿唐傳濟菴楫康熙間以孝廉爲教官輸軍帽得知縣擢  
御史升副憲以罪出塞從征厄魯特後歸里嘗過山東以  
詩寄漁洋七古頗矯健七絕亦有唐音著有雪堂詩稿有  
懷巫峽書屋三更推枕忽狂叫芙蓉照眼青濛濛巫峰十  
二離雲嶠遠來就我青門東江頭神禹驅鬼斧鑿開混沌  
分天柱雷霆日月雙壁行老龍出穴噓風雨天門奇險爭  
瞿唐柴扉斜對綠蒼茫愛向千峰結書屋書鎧隱射波濤  
光正月桃花紅爛漫岷峩春漲迷高岸葦葉橫飛下九霄  
峭壁懸崖削天半之官一舸類浮家亭午天開落日霞把

酒臨風渾似昨等閒孤負東籬花巫峰矗矗雲之表青山  
滄海催人老借問窗前舊啼鶯可見朱顏長美好西山射  
獵行贈許念中給事雲黃草白風蕭蕭野曠林深狐兔驕  
百石雕弓掛猿臂千金寶馬揚鸞鑣淮陰才人雄且武射  
飛逐走氣如虎颺馳電掣西山陽風毛雨血漫空舞我亦  
生平抱狂癡與君同獵蓋有時青驄餓號不得力弓檠矢  
筋還暫辭極目蒼茫風色惡亂煙橫處多猱獵窄徑欹斜  
穿怪峰危橋宛轉跨幽壑獸中亦自有軼材狼奔豕突欲  
爲災吁嗟乎許君願幸少留意能使山魃木魅心胆摧遼  
陽蚤秋關外驚霜蚤遼陽六月秋塞鴻辭極浦海月度邊

樓人老詩思健聲清客夢幽獨憐裘已敝空負五陵遊  
秋射獵玉靶壓金翎刀瘢氣尚腥秋風纔肅殺眾草漫凋  
零錦藉薦花白銀裝艾葉青明朝天色好射獵出都亭山  
寺曉鐘疎鐘破林出山寺本來空響迸分溪水聲遙度嶺  
風依微殘月迴斷續曉煙濛何事驚人夢明朝問遠公別  
意妾夢隨明月因君到海東君今西出塞月又照崆峒別  
意良難薄此行當自雄但畱明月在不敢怨飛蓬戍樓秋  
望衰草黃沙隱戍樓曉霜晴日見高秋飛狐嶺峻連雲鎖  
駐馬河清遶塞流極目關山腸欲斷驚心鴻雁淚難收相  
逢莫道長安近一夜西風已白頭其二嗚咽河流入漢京

黃沙浩浩斷人行營含苦霧旗猶濕陣壓殷雷鼓不鳴無  
定水邊秋夜冷受降城上月華明誰憐此際高樓女獨對  
西風念遠征對月十年京國五陵豪步下毛錐馬上刀羸  
得滿頭霜雪在玉門關外月輪高聞砧三更月轉黃龍戍  
萬里秋高白帝城已是寒蛩聽不得誰家猶急擣衣聲金  
陵雜感風帆霧槩蕩中流紅雨江南樹樹秋桃葉渡頭歸  
去晚蛾眉纖月上簾鉤蜀江秋思巴江夜雨泥輕埃初日  
芙蓉照水開兩岼遠峰遮不住一帆秋水看花來

馮行善岳池監生性端方喜吟咏教匪之亂嘗憤激作詩  
題壁間云無知小醜空猖獗釜底遊魂祇目前又云一旦



陣前梟獍縛泉臺縱入樂無涯嘉慶三年十二月偶出遇  
賊賊脅之跪罵曰我朝廷士子豈跪賊耶賊怒殺之

茗上吳研漁煦遊蜀四十餘年風塵僕僕久爲入幕之賓  
而生平無他好惟喜爲詩著有蜀游賸稿一冊秋夜書懷  
云絡緯織秋聲青鐙照眼明案頭書一卷窗外月三更驚  
夢人何在思鄉淚欲傾曰歸歸未得腸斷故園情春暮感  
懷云十年遊子屐何日返歸橈憶別歌三疊消愁酒一瓢  
花殘春色老家遠夢魂遙飛燕似相識依依繞畫橋辛亥  
除夕萬里家山遠明朝又一春歲分今夜酒愁別去年人  
爆竹驚鄉夢梅花笑客身挑鐙還獨坐惟有影相親七律

九日云雨滿江城風滿樓授衣時節漫生愁關心已逐風  
塵老回首何堪歲月遒白墮招人同作客黃花笑我又經  
秋誰家砧杵聲聲急催起思鄉屢搔頭送友云萬里橋南  
萬里程江雲山月共含情靜中得趣人多韻醉後題詩語  
更清骨傲不堪邀俗賞心癡還想待時鳴此行縱有知心  
客誰唱陽關第四聲七絕卽景淡淡屏山淺淺沙野田分  
處有人家蕭疎籬落堪圖畫流水柴門送落花山花歷亂  
野花黃草色青于陌上桑一陣香風經過處也疑身到武  
陵鄉題范月田畫桃花流水竹橋西一片幽篁曲徑迷彷彿  
廬山飛瀑處夕陽斜照暮雲低研漁兼工小詞詩盈千

餘首道光乙未將付梓矣偷兒却篋盡室一空稿遂失去  
乃郎淮金於宗戚知交處搜零簡遺篇存其什一詩之傳  
不傳有數焉可慨也

呂司馬大器之子潛與吾東王漁洋姜如須以詩贈答猶  
記明時成都繁盛閨閣婦女亦結詩社兵燹之餘不獨詩  
卷零落卽姓氏亦多湮沒可慨也其詩云繁華閨閣重詩  
書賦就濤箋錦不如萬里橋頭吟社散枇杷花下更誰居  
浣花濯錦集古今蜀中閨秀詩僅二冊而一人或三四見  
詩亦重複參差惜無人爲刊正

傅泰紳字舒鵬成都人風骨韶秀以入貲候補訓導醉司

命一首嘲戲顏唐淋漓盡致亦硯北人樂事也九陌蓼蓼  
催臘鼓兒女嬉笑華衣舞今宵司命乘雲征驂鸞駕鳳紛  
旁午我思燧人以前無火食紛紛血飲而毛茹自從鑽木  
利其功然後千村萬井炊烟飄縷縷管領中饋司煎烹三  
時飲啄累神明古人千金酬一飯如此功德難與爭而况  
珠履三千喧華堂誰爲肉鄙誰酒狂但覺糟粕精華一齊  
供饜飫釜鬻日日勞動勦將軍不負腹飽羔與烹羊五味  
咸咀嚼報賽何皇皇神之來兮燭光熒鼻觀馥馥香風生  
既設修脯載陳椒漿糟塗墨突忝薦饅餽青菰豆粒俱環  
列神之駿兮飽騰驤俯跪而祝神聽其詳松柴桐爨垢圻

滋殃大猶汚濁實生恐懼神之量兮海汪洋包含功過上  
對天閭使我眷屬熙熙平康神聽此語睂目軒揚拈髭點  
頰載歌載嘗妻孥羅拜澆醕醪一杯乍澆神興高更闌燭  
跋神醅陶玉山醉倒頽可想紫姑應遣相扶勞繪紙爲馬  
祝融燒雲耕垧刻凌層霄碧空馳騁風相送耳中彷彿仙  
樂鳴喧嘈小臣僂僂稽首退休息但見床角燒鐙光搖搖  
閱之令人失笑

龍湫瀑布聞天下四川渠縣白水洞在縣東四十里大山  
之麓洞口廣丈餘深不可測水色瑩白清冷異常自洞口  
飛出響震一山晶簾百丈盤曲而下左右數十里皆資灌

漚舊傳洞爲龍湫亦蜀地之奇觀也何士鈺咏之有云源  
高疑是自天來光閃晴空響似雷黃陂玉來遶作小詞有  
云彷彿屏風九疊依稀匹練千尋其景可想見也

每苦縣城市喧囂視山居迥殊若其人胸次超曠未嘗無  
以自樂李元端任榮經至縣治題云關前叱馭日初紅負  
載人行避玉驄近縣水聲喧雨後隔橋山色入雲中茅簷  
竹戶千家市柳徑花欄十畝宮天畔一枝棲息穩未知何  
以答蒼穹寫景甚雅而心懼曠官可謂善于立言

溫江葛衛書芸以諸生從征西海有功當得官讓于堂弟  
武生名菁者著有乞餘集蓋集唐之作也過歡喜菴快賦

慚非宋玉才長亭一望一徘徊南山積翠臨城近北澗遙  
光瀉浪迴荆棘不當車馬道榆烟將變舊爐灰停車日晚  
薦蘋藻岩畔古碑空綠苔落第後有志從戎生涯擾擾竟  
何成莫道猖狂似欄衡彩筆昔曾干氣象青袍今已誤儒  
生雲中遠樹千層列樹裏南湖一片明便欲輕橈放烟浪  
儒衣何處謁公卿西海軍營寄彭樂齋昆季云舊事無人  
可共論有誰傾蓋問王孫情多莫舉傷春淚地迴難招白  
古魂淺薄將何稱獻納榮枯安敢問乾坤可憐芳草成衰  
燕雀心知不敢言游雪峯洞萬派爭流雨過時憑高那得  
更無詩年如逝水催何急心似閒雲任所之豈有文章驚

海內更攜書劍客天涯酒酣往事多與會相望長吟有所  
思出郭遊日暖風恬種藥時新花低發上林枝人多妙句  
錦囊賸路繞春山匹馬遲紫氣欲來誰已識白雲何處更  
相期細推物理須行樂一片清光動水池隱隱飛橋隔野  
烟月光如水水連天呼童茅店疎籬下繫馬高樓垂柳邊  
文杏栽成堪入眼故園歸去又新年物情多與閒相趁只  
箇逍遙是謫仙

彭縣歐陽岡好詩移居成都構園亭栽花竹所與遊如金  
堂陳卯生漢州張玉泉輩皆嫺吟咏著詩一冊春日園居  
云可人天氣日初長打破愁城入醉鄉一幕清風鶯語靜



半簾晴日墨花香竹添細筍穿幽徑燕壘新巢入畫梁高  
卧不聞塵世事心閑多爲作詩忙古墓云蝴蝶灰飛陌上  
錢遙看荒塚草芊芊一杯黃土埋花骨三尺香泥誤少年  
楊柳陰中春似水杜鵑聲裏雨如煙何須費盡移山力富  
貴誰攜到九泉曉波云蘆花如雪映空川客子臨江泛野  
船人語驚殘孤雁夢槽聲揉破一江煙柳含宿霧迷官渡  
帆挂朝霞趁曉天沙上鷓鴣閑自在日高猶伴冷雲眠游  
青城山云峭壁嵯峨接翠微偶過林下扣柴扉數聲梵語  
來僧舍一徑松花點客衣山列彭門懸若削水流灌口去  
如飛仙人隱跡知何處古廟顏垣挂落暉城東卽景云偶

然出郭豁雙眸薄暖輕寒四月秋花塢日晴紅雨過麥田  
風盪綠雲浮山環曠野千峯立水合長江一派流九眼橋  
西頻悵望淡煙疎柳薛濤樓

劉菊航銜詔月漁刺史之子習舉子業未能回籍應試以  
東河例議叙分發來川需次橐筆遊幕登武陽城樓詩云  
斜陽倒景上高臺古戍臨江畫角哀浪影拍天浮遠樹灘  
聲入耳送輕雷傷心往事難回憶嘆息流光不再來試問  
茫茫東逝水奔騰何日得重回春日云小院迴廊草色迷  
垂簾不捲浪痕低春眠午夢人初醒風暖晴簷鳥亂啼入  
硯楊花沾墨潘營巢燕子落田泥客情旅思知多少短句

吟成懶自題苦雨云陰靄橫空黯未收山城日日雨聲稠  
平湖浪泛桃花水三月寒生枕簟秋古渡雲埋芳草徑綠  
楊煙鎖酒家樓可憐花事成春夢猶聽鳩啼不肯休

世傳楊展爲我眉無空和尚轉世和尚銅梁人從通天和  
尙受法臨濟二十六代嗣也然身證四十八炷表四十八  
願血寫法華經二部金書貝葉經一函我眉縣東大佛寺  
銅鑄大士像高三丈皆和尚于楚蜀間募化爲之展字玉  
梁嘉定人封華陽伯其我眉山禮佛詩云極天烽火照我  
山十載慈悲慘佛顏夢裏涅槃身重到青山無恙白雲間  
觀末二句似亦自知前生乃膂力絕人兼通遁法以忠受

害嘉定胡不廟祀之也

余齋號純菴青神人國初避亂江左賣詩文字以自給不  
人富貴門詩學漢魏不屑近體與野人高士遊康熙乙丑  
卒于瓊花觀著有增益軒詩集付友人選輯失其稿新安  
姚綸如于扇頭壁上搜得軼詩數首倪永清云純菴詩閒  
情逸志超然塵表如魯仲連陶元亮一輩人元旦云今晨  
氣宣朗檐次透曙光春風扇和氣悠悠襲我裳道院自幽  
靜中庭焚異香香氣何氤氲隨風泛長廊我本羈旅人感  
此歲月長孤蹤謝塵事靜坐閱班揚濡毫改舊詩開樽引  
巨觴槃礴無拘束頽然入醉鄉天地氣候改陽和易冰霜

草木漸勾萌梅花何處芳幾欲探消息林水空蒼茫翹首  
憶江南雲霞蔚相望

黃山谷紹聖初貶涪州遂自號涪翁後移戎州曾遊屏山  
憩東關石洞人謂之涪翁洞桐城張曾敏詩云石壁瞰江  
流藤蘿舞烟霧古洞稱涪翁徑窄難騁步摩挲剝蘚苔隸  
文數行註旨哉康節語卓然山谷句雒誦至再三令我發  
深悟嗟翁瑰異曠世才被謫蜀地渺塵埃探幽選勝偶憩  
此天涯爪迹何有哉後人思翁不能置稱翁卽以稱其地  
蕭然石窟等甘棠一憩芳蹤口碑置太守何公亦何賢表  
彰名蹟費雕鐫括公生平數語足不啻快讀琳琅篇返荒

一洞成雙美洞口波流清且泚波光蕩漾是龍湖年年注  
入西江水

張槎仙沆成都人以時藝名屢刻板行世鄉薦後人不第  
庚辰會試德州盧南石先生爲總裁已定魁以策有未合  
復落孫山爲石泉學博八年詩爲楊蓉裳賞著有困勉齋  
詩錄才氣凌厲一切儕輩推服新安大風歌云黑風捲石  
羣石驚大石小石相撞鳴飛空亂擊日無色渾茫不見新  
安城慨自暴秦國失鹿楚將如狼萬里逐哀哉秦卒二十  
萬同化長平古阱肉千年道路腥風生荒原白晝青燐明  
鬼雄一呼眾鬼起各提髑髏空中行噫氣成風勢驕恣捲

地飛沙駛萬騎直將千古不平心化作狂飈號天地噫嘻  
鬼自有鄉各有族魂胡不返聚林麓一語未終風愈豪千  
鬼萬鬼合聲哭大風渡河作歌云飛鳥之外河源起茫茫  
一氣瀉何駛我我龍門東不住平壤奔騰五百里加目黑  
風天外來衝擊濁流龍窟開老蛟奮激龍鼉怒滿河閔戰  
鳴驚雷我駕輕舠入縹緲蒼波一翦速孤鳥風力掀水水  
挾風洪濤激盪衝雲表對此茫茫欣高歌歌聲激昂通星  
河大哉觀乎有如此助人壯氣蟠胸多安得博望槎載我  
入牛斗手執天瓢挹河源拾盡九河付一口不然借得夸  
娥神更集庚辰童律龍威叟移取蜀棧千重山塞平萬古

幽深不測藪彼旣康莊茲平原盡種禾麥變畝節盈補  
虛一轉移乾坤缺憾更何有奇思內結只長歎孤舩叩處  
水浩瀚舩聲未歇風聲催輕帆已抵河陽縣夜過五丁峽  
云孤客急宵征昏黑入幽谷兩壁何巍崔壓人生畏縮行  
行崖愈高惡狀露林麓鬼鎧巖洞青虎睛石穴綠中道炬  
忽滅惶恐意馳逐魑魅憂前立盜賊懼旁伏狼慮攫我馬  
熊愁嚙我肉疑思方心繁雷電催雨速更虞猛雨來隨波  
葬魚腹膽怯急客鞭驅馬出天獄遲明登雄關回顧尙駭  
目朝天關云動地捲風濤江聲正怒號峽臨深澗睂山入  
亂雲高厯險人心怯穿雲馬力勞百年傷浩劫懷古意切



初七盤關云堞影一峯排茲關何壯哉地分秦嶺斷天割  
蜀雲開設險誇雄鎮紛爭歎霸才時清閒鎖鑰翻覺太巍  
崔晚登褒州城東樓云夕照鄉愁重飛樓縱遠懷棧雲千  
嶺落暝色萬山來地險關河壯風高鼓角哀故園何處是  
回首獨徘徊聞雁云天澹月無影風高柝滿城一聲驚旅  
雁千里動鄉情燈黯人長坐宵涼夢不成故園無限好何  
事爾孤征秋夜雨中聞蟋蟀有感云秋氣已難耐清宵愁  
更深況當微雨際又聽亂蛩吟落拓羈人感蕭條旅夜心  
憂懷催疊起何事動悲音

石泉周齊勲建堂嘉慶辛酉拔貢由隆昌教諭保舉授甘

肅文縣令因事謫伊犁著有伊江集遣興云檀板敲殘北  
部腔劒門有客成伊江黃庭細讀風生座白墮閒斟月滿  
窗飽歷冰霜誰第一全經淒楚影成雙邇來看得窮途破  
十萬愁魔取次降君恩猶得近祁連秋色平分十二年  
雲外天香猶是也月中桂子又依然壯人山海知誰賞老  
我風霜祇自憐回首不堪題往事雁鴻聲裏自憂煎

章響山汝梅會稽人乾隆丙子孝廉歷署鄧都新寧達州

金川用兵曾辦軍務後補甘肅文縣因事謫戍黑龍江匹

馬投邊著詩千首嫩江

黑龍江  
支流

白山望不極黑水暗通潮

春盡花無信秋先葉早彫暮鐘初動後沙磧一身遙老病

孤危客荒江魂暗銷塞冷風初勁秋高馬正肥一鞭無近  
遠聯轡出郊畿狐兔爭先盡烟塵未罷圍斜陽人影外騰  
沓臂鷹歸雄健得杜少陵氣格

費錫璜爲蜀詩家巨擘二子皆能詩軒字執御春閨云豆  
蔻風微二月時曲欄亭畔雨絲絲梨花半樹將成雪下著  
珠簾總不知此種風致殊不易得

安縣大安山有細泉建一草亭翠柏森茂陳樽署令遊此  
贈際德僧詩云蒼茫深林曲島間杉皮小屋占溪灣一奩  
明鏡空中色數朶蓮花雨後山有客到門談般若幾時載  
鶴弄潺湲平生翰與希夷子拾翠眠雲鎖日閒

雙流古廣都地去錦城四十里風俗已與川南相似蒲椿

泉載陽廣都竹枝詞云盼到城中趕會時先期買得粉和

脂匆匆忘却廟前看今夜何人守石獅

調謔婦女者官即繫之城隍廟石獅

足上謂之守石獅

腰不圍裙項挂珠邀來同伴盡村姑山門恰與

郎相遇笑問神前禮拜無蹴損弓鞋折斷腰拜香拜過鴨

鵝橋大居士且先歸去兒要三更看換袍小弟在前娘在

後中間有女步香塵語娘在後稍清靜免得燒香亂看人

語雜恢諧足紀土俗

劉壘號問樵成都諸生年十一卽勤於學車雙嵐以女妻

之招致門下文筆縱肆有議論後乃務爲清刻然皆不得

志於有司近習青島術病起詩云蠟屐飛登太華巔輕舟  
徧歷五湖煙得江山助文纔壯無世俗拘品卽仙春草秋  
花隨變相松風水月悟眞詮此身一任蒼蒼意不必蠶絲  
自縛纏

綿州何人鶴字九臯在吳江唐陶山署袁好來遊方願大  
耳目如曙星口若懸河年八十二如少壯從弟子十餘人  
席間陶山與諸客多以詩請教九臯獨不肯及行主人送  
米酒食物又去而之他未久以函報云諸君詩皆入詩話  
矣翻閱悉已改竄其實皆弟子評騭子才未嘗入目也陶  
山喟然曰何三不落隨園九臯見諸人作秋草詩曰詩難

佳但他處皆可用非南方秋草其弟星山請和卽用韻成  
四章首云欲尋三陸堂何在月白霜高叫夜烏次云江上  
鷗眠三楚月塚中人卧六朝烟三云曾畱芸閣供書帶八  
藉宮人葬玉釧四云憔悴每懷君子德芳菲終抱美人名  
富與墨莊鳬塘兄弟論詩墨莊云前人五律有一氣呵成  
八句不對翻成絕唱者君能否卽走筆爲詩送之云爲祭  
君先隴同君隴畔眠松風將月色吹墮酒樽前此地一分  
手我懷殊悵然散關巫峽外秦楚共新年時墨莊與弟孝  
廉本齋將往楚鳬塘北上也可稱能手女金英好讀書詩  
思清矯早卒月下與嫂折梅云向月折梅花簪墮下堦拾

人好影亦好喜傍梅花立小兒照鏡云小兒初照鏡欲捉  
鏡中人掉鏡忽無影驚疑藏卻身

羅江魏文鶴字鳴臯少讀書後販牛年五十學爲詩有抱  
憤吟晚歸云落日辭鴉背微微露濕衣牧牛猶未返放鶴  
已先歸月白分松徑燈紅見竹扉長吟摩詰句行樂更忘  
機偶吟云拋卻蘭皋已四春讀書真箇可安貧倦時便睡  
何妨晝樂地斯畱輒過旬月下招陪妻已醉梅邊換韻雪  
同新草堂先世家風在野鶴閑雲氣味親

鐵嶺高琴泉塚爲吾東初願園尙書典試所得士川中教  
匪之亂投劾軍營畫腰弓矢持矛逐賊夜然燭治軍書負

奇好詩終不遇以歸其子鑰號澄軒選岳池尉乃搜其遺  
編刻之琴泉幼慧九歲能詩春郊晚望云流水千竿竹春  
風一徑花落梅云數聲玉笛月當戶一夜春風雪滿蹊西  
湖云流水斷橋詩屐冷梅花草閣酒瓢香皆十歲以前作  
杭堽浦先生見之亟爲稱許在蜀目擊時事拍案唏噓作  
詩愈橫放白蓮教掠民間美女爲妻號二炷香咏之云翠  
袖珠裙縞帶長素羅抹額嬌紅妝深閨催出誰家女細馬  
駝來二炷香白旗前導銀槍簇抱鞍不敢低聲哭昨曰初  
從江詩來今宵又向山巔宿山巔凝望起風沙千里烽烟  
不見家可憐身入白蓮社可憐貌似白蓮花將軍破賊賊



披靡繫組成羣擁羅綺螭螭領試鷓鴣刀頃刻香消化烟  
紫軍中有感云貔貅萬竈布機槍千里涪潼寸寸防烽火  
連天迷曉月旌旗背水照殘陽墨磨盾鼻軍書疾米漸矛  
頭野飯香欲問功名常自愧木蘭不用尙書郎別諸營吏  
士云請纓投筆事全乖壯氣雖存志可哀渴想洗兵朝望  
雨驚看破柱夜聞雷眼前未必無狂客胯下何曾有將才  
傳語柳營諸伴侶先生彈鋏賦歸來

古人行軍地名最忌岑彭在彭亡被刺四川朱總鎮射斗  
剿賊至西充牛頭寨賊首冉添元設伏圍之朱大呼將士  
殺出行十餘里復被圍問此何地曰老虎壩朱曰吾犯絕

地死矣蓋朱豬同音豬遇虎必死也齊二寡婦以踏軟索  
馳解馬出身色故狡麗其敗也官兵逼之至謝花坡墜崖  
死亦應其名焉

達州賊王三槐將至鄰水縣城不固民惶懼忽一童子躍  
起自言是仲由諭眾速辦七星旗爲汝禦賊並教以步武  
賊至望城上軍容甚盛遁去人皆以爲仲夫子之靈護城  
遂更新聖廟

茗南吳梅江清潤以申韓家言遊蜀胸懷洒落動輒得詩  
風雅中人非徒蓮幕中人也著有梯雲書屋詩鈔不下數  
百首尙未梓當壚曲云十五當壚著名姓門前一帶垂楊

徑金鐙頻隨公子來玉鞭笑指王孫贈王孫公子興偏多  
雙舞輕裾試越羅象管鸞笙露纖指臨風一曲繞梁歌流  
蘇斜掛芙蓉帳寶鴨蘭薰烟乍颺仙子樓居咫尺間珠簾  
掩映雲屏障搗麝奴香滿壺金瓶倒瀉無時無不須苦憶  
酒家胡秦氏樓中自有夫寒夜吟索居不成寐蟋蟀鳴我  
堂愁人攬衿帶中夜起徬徨立身在何許遠鴻隨風翔元  
景奄云迺晨星誰扶將鵲鷄鳴樹顛嗷嗷羨飛揚悲哉人  
畱滯遊子思故鄉憂來無行伍俯仰若干霜蘄彼草蟲吟  
輾轉徒自傷願言飽葵藿努力務朝陽秋暮晚眺云一望  
渺長空天然點綴工山從雲外碧樹向日邊紅寒老孤煙

裡秋深落葉中停車還坐冷千古賞心同秋晚東橋遠眺  
云遠眺夕陽汀橋分彼此形一灣秋水碧四顧晚山青林  
暗煙莊屋人稀雀噪亭扁舟移棹去何處柳邊停雨後栖  
賢寺法雲樓卽景云杳杳復冥冥嵐光帶雨腥林深孤廟  
綠雲淡數峯青古墓畱遺蹟戴墳在樓後山上荒亭剩舊形樵夫

歌一曲韻逸最堪聽栖賢寺殘梅云一段香魂歛欲無尙  
餘清氣散平蕪神仙風骨寧歸幻處士湖山總是孤老去  
不磨眞玉屑寒來方識舊根株潔身肯向人標榜漫遣徐  
熙作畫圖得此春晴眼倍明寄情山水有餘清人來古屋  
和煙靜鳥下寒塘帶雪輕無可奈何禪半偈不堪持贈月

三更年年錢券償詩債松竹與君爲訂盟登關鳳樓卽事

云偶向東郊更向東搖鞭直到梵王宮顏雲欲下催詩雨

拂面頻來落帽風不信善騎偏墜馬

余因馬失蹄而墜

那堪惜別

又驚鴻

時孫子柔有南回之意

伏龍未必殊關鳳一處題糕處處同

時朱六橋司馬在伏龍觀登高

次孫景喬姊倩登伏龍觀原韻長生仙蹟

是仙寰四載淹留幾度攀落拓且拚今日醉飄零休憶舊

時顏人來積雨初晴後秋在叢花未放間風滿江亭天欲

暮倦飛應學鳥知還咏水仙云小齋兀坐意纏綿盆裡花

開倍覺妍似我清閒真是水如卿雅淡合稱仙一杯襯出

黃金嫩滿盞承來白玉鮮弱質柔姿耐春冷與梅比潔欲

爭先

張懋柔字希仲漢州人成都府學生官廠粥云風蕭蕭雨  
飄飄飢腸霍霍雷聲號聳身抱膊來荒郊廠門開官人來  
香杭一斛水干髻官人去廠門閉隸人懽呼廠丁睡若有  
人兮僵而立昔日乞錢錢不得今日典籌籌罷給小遊仙  
云瑤池阿母頗風華爲道蟠桃大似瓜曼倩欺人弄狡獪  
至今不許再開花飯熟胡麻洞已迷一雙青鳥喚遲遲江  
郎夢醒才華減爲擬曹唐小樣詩

蜀俗有擲磚之戲里巷小兒所爲有藉此賭采者用之喪  
貲但未經目覩此戲亦偶爾孫瘦石有詩姑紀以誌風土

墦閒古廟溝塍曲豬奴狗盜襍牛牧輕煖何來富家兒袒  
裼五錢投六博反手爲陽覆手陰磚頭梟盧利斷金殘衫  
破帽賭一擲秦越肥瘠僉同心彼匪旣負富兒勝詰朝設  
局橋松徑千錢一注富兒豪腰橐倏忽瓶之罄富翁咎兒  
兒出走蠅營狗苟爲戎首夜定假面刼而翁而翁憤絕廷  
中首鋌而走險兒盛年不歸黑錢歸紅錢

嚴芑汀履豐綿州人詩筆豪健教匪之亂感憤作詩云賊  
匪渡嘉陵千里烽烟惡苦聞啼泣慘那計讀書樂惟我將  
軍德馬啼岡踴躍烏合一掃除道人傳木鐸到處振絃歌  
鄉塾開笥橐弟子與先生相依似河洛眼見殺氣消耳聞

頌聲作旄頭已韜芒熒惑應收虐如何更肆威將我書齋

燭秀才命實窮行當抱佛脚

移館清涼寺

清醮道士歌張道陵

死幾千年人猶謂彼成神仙今之道士無乃是執旗仗劍  
行如烟鳴鑼擊鼓號清醮家俱酒食迎龍船道士氣揚歡  
詛祝兒童結隊相追逐巴山狂賊久爲災災流州縣五十  
六死者已矣生呻吟野火燎原鬼啖肉將軍七載未消弭  
賊醮難降瘟易服吁嗟乎旗可舉來揮妖氛劍可提來報  
聖君年來百姓多離苦不聞道士肯從軍春夜書懷二  
首舊書百讀自翻新草色盈階陋室春花是芳蘭堪贈友  
墨如拱璧不分人天空應許鴻飛遠屋小何堪燕語頻良



夜此情殊默默孤鐙結蕊故相親春雨瀟瀟爲釀寒桃花  
爭放獨憑欄月來尋我開樽易詩恐猶人下筆難仙嶠豈  
容棲枳鷺海鰲終不上漁竿袁安卧雪非奇事未必東風  
吹不殘

漢州諸生張懋襄字言嚴黃天蕩云江水滔滔流向東  
朝已作偏安國直認杭州是汴州半壁河山誰挽得黃天  
蕩百戰餘好把英雄血憤舒郎殺賊妾椎鼓忠臣健婦眞  
雙虎痛飲黃龍有意無可惜君王不重武腦後都忘二勝  
環清涼居士名千古春閨怨云大堤楊柳宛成絲記得當  
年送別時自去白狼音信杳悞人夜夜數歸期倚樓望斷

九迴腸卽自封侯妾自傷一歲春光容易盡褪完蝶粉與  
蜂黃撇卻金箏與玉簫望穿秋水路迢迢無情怕見雙飛  
蝶惹得愁懷總不消鎧殘燭炮繡帷低掠亂飛紅踏作泥  
如此光陰如此景那人今夜在遼西

榮邑張鳳儀性端謹家貧力學在鳳鳴書院山長廖扶九  
資以薪米今歲王遲士延課其子讀書人本色惜猶困童  
場乃父竹亭謹厚人也名懷謙字吉六嘉慶戊午舉人終  
身不仕以教讀爲業喜爲詩多散失僅存癸酉己卯兩年  
之作五十一自述足見生平我生歲月苦蹉跎邇來竊自  
癖吟哦比歲誕辰詩一首聊爾抒懷等嘯歌今年四月有

八日余年五十初度一漫勞親串共稱觴沉吟直把平生  
悉憶我孩提失怙時高堂慈愛異等夷兼有二三賢伯氏  
玉成共費許心思慨自童年造就傳南牕佔畢理章句質  
鈍賴多賢師資荆棘叢中開覺路泮水得遊弱冠餘從茲  
努力事前途雲程跼跼又十載卅餘始獲登賢書爾時意  
氣頗豪放乘風願破天池浪扶搖急自奮鵬搏志欲干霄  
不少降揚鏹北上快爭先馬去如飛穩著鞭花柳沿途何  
暇顧行行直達五雲邊春風一試忙逐隊鏖戰棘闈孰甘  
敗雁塔方期淡墨題等閒報落孫山外杏苑看花願已虛  
正似邯鄲夢醒初長安米貴居不易撥棹歸來慰倚閭曰

歸曰歸自京雒素衣幸免緇塵著家人聚首話團圓眞覺  
庭闈饒至樂誰知樂事竟無常喪明未幾又悼亡傷心更  
痛慈顏別數年邁歷幾滄桑憂戚頻遭逸興寡百事無端  
付塞馬竊嘆人海苦茫茫蕉鹿誰分夢眞假頻年設館住  
山林蕭齋無事謾閒吟春桃秋菊隨時種風雨綢繆直到  
今今日從頭思往昔閱世眞如駒過隙人生行樂能幾時  
荏苒年華已半百自分平生無一長鬚眉虛著槐昂菴壽  
詞休益過情恥人祝何如自道詳聞說佛生亦此旦余果  
何修敢同算縱使期願眞可期精神已覺銷磨半况復昨  
秋孤父懸向平願子果何年若論婚嫁完兒債天公應許

歲月延讀書我亦思報効其如衷褊骨更傲嘗閱宗臣報  
劉書久矣自視官非料從今絕意訂鵲盟得得偷閒了一  
生莫道詩成殊寡和鳥鳴屋角正嚶嚶生日偶述云年如  
日中景漸近桑榆一籌猶未展徒抱七尺軀四方志安  
在那敢慶懸弧多情二三子相攜過我廬稱觴未及竟云  
有客操觚袖懷出短札一紙故人書讀之堪擊節幾欲缺  
唾壺酒酣飛逸興把筆撚吟鬚章山下楊齋中次早遁去  
旋謝以詩因而寄此云下榻小齋中舊雨歡新遇銜杯話  
三更衷懷未盡訴意欲盡衷懷詰朝宜少住睡起日三竿  
我曾爲君語詎意我晨興與君竟匆匆去本非不速來行色

何其遽悵望已移時  
嘿嘿思良晤忽遣長鬚來  
手中持尺素雖屬遊戲  
文涉筆都成趣欣聞鳥  
弄歌嚶嚶鳴高樹上  
元前連日小雨云記當  
人日日來東新歲初逢  
麗景融越宿忽然雲幕  
幕連朝竟爾雨濛濛漫  
憐士女春遊阻預喜桑  
田水澤充元夜繭絲何  
用卜端知霖霖兆年豐  
癸酉辭館居家云宦海  
茫茫嬾問津年來並謝  
作西賓舌耕何苦辭遶  
粟家食自甘守憲貧高  
枕不嫌雛燕聒含飴偏  
愛幼孫嚶幽居樂意時  
關會斗室自饒宇宙春  
五十時舉一子云朝來  
門左喜懸弧漫道中年  
益鳳雛難卜童駒能跨  
竈敢云老蚌定生珠試  
啼過獎何須有舐犢深  
情那禁無從

此頻擊娛我目分甘看與幼孫俱

涪州周星圖柄隨宦江西著有聽石溪詩集嘗作畫梅歌  
人以李太白目之咏梅古詩三篇皆佳萬輞岡畫梅歌云  
輞岡畫梅技尙粗自種梅花八百株梅花高處與岡平人  
在梅花梢上行朝陟梅花頂暮抱梅花影化將花身作人  
身人與梅花一樣冷畫梅纔得到此境輞岡風度亦猶人  
傲骨撐持雪裡春坐近梅花香浸骨下筆如何不精神只  
今欲訪輞岡去路入梅花人不知八歲時能賦早梅詩極  
爲先輩器許頃爲嘯廬先生述及感而作歌云老梅卷曲  
瘦入骨苔痕被體衣盡綠白雪飛來代作花雪與梅花皆

不俗老梅獨抱自家春  
優孟衣冠不借人  
瓊花放出一枝  
冷生意卻比雪精神  
賤子慨然發長嘆  
梅花又看三十遍  
人生那得長如梅  
一年一度春一換  
君不見兒童竹馬頭  
成雪堂前莫教輕離別

時眷屬將歸

晴樓於敗堵中得枯梅一

本枝幹縱橫有致  
移植臥室櫺外  
朝夕灌溉意甚珍之  
囑題七古一章云  
聞君忽有愛花癖  
親與梅花比肥瘠  
梅花自瘦君不肥  
移來隔窗僅咫尺  
梅在花間迥不羣  
落落孤芳雅俗分  
况乃剝膚祇存骨  
如此奇花合近君  
君自冠裳花自禿  
君自妻孥花自獨  
從前十載委泥沙  
梅花幾欲向君哭  
一朝移置作比鄰  
誰是梅花誰是人  
君看梅花宜痛



飲梅花看君倍精神春到花間花開早花轉少年人轉老  
君愛梅花意近癡梅花愛君情更好送莊鶴田歸吳下二  
首相逢日日接歡顏又唱驪歌入故關歸去轉難拋劍閣  
生來尙不識吳山鶴田生于蜀中三十年矣今始南下遙知後會原無定未  
忍言君遂不還何必芳徽勞想像新詩猶在齒牙間近于純夫

處讀鶴田詩

竹籬掩映護窗紗石砌依門接徑斜尙憶我來常  
作客頓忘君去是歸家惟將淚眼看垂柳不把春愁到落  
花無限江流增別緒當年轉恨識君差潯陽江口號云道  
出潯陽局勢開潯江原自蜀江來儂家昨向江干過飲得  
故鄉水一杯佳句如藤蘿多古意風雨聚秋聲暑從今夜

盡秋雨白雲深冷露低垂岸疎紅點亂山小沼剛迎戶奇  
峰欲瘦人雪捲寒梅穿徑去春隨小雨度江來宵寒細雨  
庭花瘦晝暖輕風野菜香竹院微風來燕子春寒細雨落  
桃花老去讀書如訪友閒來課子當栽花松聲雨過猶疑  
雨足底生雲不見雲

四川學使吳壽庭樹萱與兄曇繡俊齊名壽庭子友箎爲  
忠州刺史能詩曇繡子慈鶴官侍讀亦能詩壽庭後官川  
北道曇繡在廣西襄理軍務著有枳杜集中有云杜工部  
西山詩云轉粟上青天幼時誦之不覺其工頃征苗凱旋  
憶在黔省目覩役夫運糧登山偶一失足卽墮千仞崖心

甚憫之少陵流落梓閬屬吐蕃倣擾蜀軍處處防秋轉運  
餽糧艱難殊甚此西山詩之所以作而五字曲盡險苦眞  
古今一幅棧閣運糧圖也證以予之所見尤爲不虛詩云  
萬兵日食米百石每石四夫肩頰劬人負二斗五升遇崖  
壁陡絕處猶苦不勝  
甲鎧鍋帳藥鉛礮百兵又需六十夫一夫升米累而計千  
石僅足五日儲平原轉戰何足道輜重絡繹坦長驅所苦  
青山切天上鳥道一綫旁趨無躋則入雲顛墜谷膏血點  
點塗榛蕪將軍號令如火急帳下庾語庚癸呼俯見溝底  
小旗出每運糧一起押運  
者執小旗前行千百蟲蟻行蠕蠕知是江內運  
糧至合軍洗釜顏懽愉竭夫之力鼓兵腹兵飽夫已白骨

枯古今情事類如一黔山不與蜀道殊我無杜陵驚人句  
哀此役夫長憾吁天寒賊退米垆積將軍馬上彎天弧歸  
來笳鼓競襍還好事爭繪征苗圖與其繪此征苗圖盍不  
收取役夫之骨還彼父母與妻孥蜀臬滿洲多公云征猱  
猱時山上危線一道下臨深壑負糧者人不並行終日不  
及數里蜀道運糧之難如此惜吳公未親見亦無咏之者  
因借此詩補之

羅佛岩珍威遠人嘉慶己卯進士官湖北石首知縣卒於  
任生平喜吟咏惜無存稿有友人尙存一二連日遺失小  
物口號云鞭絲帽影走匆匆路上人如塞上翁好夢漫尋

樵子鹿頻朝又失楚王弓物從遺後心偏愛事到臨時計  
始工惟有客懷拋不去村雞明月馬蹄風落葉云誰記春  
風費剪裁誰憐秋雨傍塵埃將軍大樹成功退仙子瑤台  
撒手回鴻雁自穿雲路澗山家依舊水窗開楓橋柳岸荒  
涼甚一例王孫竟不來折桂花示諸生索和云折得名花  
露尙滋一家散插一枝枝散花先要償花債一朶花償一  
首詩題長安主人壁云落日長安新秋溽暑殘客心傷  
道道天意釀輕寒蟬翼人情薄羊腸世路難故園千里外  
何日釋征鞍春江閒眺云興來隨意到春堤幾樹桃花傍  
竹西記得去年遊賞日亂紅飛處一鶯啼新輯勘靖教匪

述編成題後濡毫戰血染模糊寫出華嚴小劫圖人傍白  
蓮開殺運籌經黃屋展良謨河山奠定羣陰伏霜雪春回  
萬卉蘇幸際昇平皆帝力興歌擊壤遍堯衢

許炳號亦帆浙江仁和諸生原任簡州分州夢鷗桂之子  
也秋闈屢薦不售遂以書啓遊幕于蜀沈研怡刺史以三  
百金延聘賓主相得後援例銓雲南習峨典史百菊溪先  
生爲總制刪蠻求掌摺奏者未得其人今四川將軍廉方  
爲臬憲深知亦帆工于文遂以名薦時 皇上賜軍士藥  
餌辟烟瘴欲繕謝 恩摺延入命卽席前起稿揮筆立就  
閱畢深爲嘉賞遂在軍營自刻印章曰戎馬書生奏凱後

復任報銷局事巡撫某新納妾舊列平康籍有輕薄子戲  
編詩詞巡撫微聞以亦帆素喜爲詩疑出其手及保薦軍  
營効力人員制府以六品銜薦亦帆巡撫堅不署名僅升  
鎮沅州吏目因母老告歸仍居于蜀道光十九年回葬父  
歿于家詩多散失長子堃號偶三就長寧李紅樵刑席次  
子城號崑九就成都段燮庭幕司筆墨事亦帆詩尙存二  
冊圓熟如彈丸脫手其功深也夏夜讌集靜稽堂卽景放  
詠云斜陽市散喧聲杳飛影青山紅樹杪入夜涼生花氣  
香人間歡會誰云少卽今仙吏何風流客集林泉無俗儔  
是日在座者皆野老山人入手俸錢沽美酒興酣氣欲吞滄洲雷聲霎

時起芳甸檐壓重雲牕掣電萬竅爭鳴幕燕驚山人望山

山不見我疑雨意是催詩豈料詩成雨特遲擲筆啣杯忽

大笑天心莫測非人知流黃倏復明前席我醉欲眠君莫

責

子素不飲強承觴齊公之命不覺頽然而卧矣

飛渡逢壺俯玉樓迴瀾生紫天

凝碧東瞰岱嶽南瀟湘千秋萬古日月長蛟龍戲舞海水

立失足一墮歸高堂堂空客去月如燭起抖滿衣花影綠

行樂及時幸勿遲隨地還須知自足月下聞雁云秋雁不

忍聽流響益淒清寒月不欲見入幕何光明聞聲顧影獨

徘徊千里關山人未來但使儂愁亦何惜天邊月雲中鴻

莫照征人復嗚咽村口暮望云日沒亂峰西嵐生樹色迷



鐘沉山寺月樵唱水雲溪寒景澹欲合烟光空漸低幾家  
鐙火上隱隱閃前堤官舍紀事二十韻云官舍如僧舍何  
修得淨因藉茲安樸拙寧敢怨清貧雖似山林客居然草  
莽臣親朋稀絕域景物嘆邊塵瘴雨常多夏蠻花不待春  
宵深啼犵鳥水急乏遊鱗過午風聲猛凌晨露氣臻每至日午  
則風聲漸猛曉起霧氣迷漫則是日必晴署高紅日早村隱白雲屯左右雙江  
險青黃眾壑敍署居把邊布固兩江之間眾山之巔一官爲冷署百戶半夷  
民關守遐荒地鹽巡古渡濱分防城市遠迎送往來頻距城  
三站而爲東道慙賢主南交罕故人拜叨清吏俸消耗楚  
迤南大道有邊解過犯之責上解他郡廳二站笑語誰堪共烟  
囚身下解普郡三站往返差費皆須捐給

霞我獨親客孤嫌晝永家遠感時新久乏強臺想常存退

谷神但期供菽水詎可棄萱椿瓜代秋深候替拙歲暮辰

來年當此際應得樂天倫宿布固江云半載復重遊春江

水漫流山燈搖夜雨荒驛亂更籌奉使駒町遠

時奉差赴  
臨安府即

古駒町國距  
通關廿餘站

前途瘴癘稠趨公寧憚險一宿暫勾留辭官

七律云辭官翻北乞官難春早陳情夏又闌寸草久懷依

愛日及瓜無代阻歸鞍轉鱸涉想憐張翰甌金多塵笑范

丹悵望謝莊千里月幾回引領獨憑欄

三月初已委濠溝  
司巡檢謝君前來

更替至夏  
五來到

旅懷云惘惘出門何所之天教飲水古滇池黃

塵赤日蠻荒路白髮青閨風雨時每到清和人易別

上年  
入都

謝選令則之任我  
陽皆清和時也

爲求升斗雁分馳

仲弟毅堂同時選  
得山西河東巡檢

頭怕見關山月轉覺團團惹客思佳句如烽連巴峽愁邊  
月烟鎖山城咽暮笳斜陽影淡孤村路野水聲沉古寺鐘  
雲拖嵐氣吞村樹風走松梢捲海濤事憶隔年渾似夢雨  
多三伏轉如秋草爲寄生成遠別枝原連理繫深情邊徼  
衣冠多異俗蠻荒花鳥不知名皆可諷咏

江南吳宮詔號仿蕉少孤力學爲諸生遨遊燕趙徧歷滇  
黔近復游蜀詩滿篋筍雪後口占云同雲一起如許厚雪  
積不用掃花帚共喜玉燭及時調雪澤於今徧郊藪但見  
琪花幻異形附著枯枝枝不朽滿眼世界盡琉璃望見高

山遺培塿祇因昨夜朔風寒瑤島瓊林列如阜欲尋瀾橋  
路已迷驢背跨學牛馬走往來本無炙熱心潔白一生安  
素守門前那問車馬稀園植梅花相依久花開如雪雪亦  
香淡淡相道堪比翫映來書案勝螢光胸中雪亮疑何有  
惟憂天涯白屋貧歷盡嚴寒爲餬口淒涼世態一時同落  
溷飄茵驟難剖回看四野絕人蹤江邊尙有持竿叟柴門  
竟日對寒流消寒惟攜一樽酒九日登眞武山山在隄爲縣西門外  
岩前獨立望蒼茫乘興遨遊陟歷忙卻喜岡巒登百丈不  
須風雨說重陽林因霜後煙霞歛山愛秋來淺淡妝一往  
深情何處寫每逢佳節憶江鄉故園今日話重陽蓼剩疎

紅菊有黃花到淡時風憶晉詩吟高處韻餘梁音函萬里  
書懷李賦就千言序記王此際登臨入地異犀江

隄爲城外有河

向名沉那得比南昌

丙江祝由康熙丙子拔貢善書畫工詩嘗刻楹聯云孝莫  
辭勞轉眼卽爲父母德無望報回頭卻在兒孫

夷驢如中地產而頭有繭栗似犢踏遍荒山足力疲何人  
風雪共尋詩黔驢無技真堪笑頭角崢嶸獨爾奇

夷犬毛尾形聲如巨鐘形似狻猊登牆越屋高可三尺  
猙獰那肯卧藩籬宋鵲韓盧未足奇狀駭蠻童非犬子吼  
驚山谷是獅兒

王遲士侃在榮日久集所聞見作泊官記異一書予爲序  
之嘗摘錄數篇中一條云漢州諸生張渠軒館金堂張某  
家園中牡丹百餘本一老本數年不花忽放二朵大倍于  
常主人喜置酒共賞夜深燈暗復明有二麗人在側詢知  
爲鄰女一與暱一與爲文字交每相唱和欸署粉兒其一  
則香兒也粉兒詩風風雨雨繞朱欄泣向殘陽淚未乾直  
到飄零猶見惜此恩累世刻心肝又有春風終日伴張郎  
之句後渠軒憊甚主人使二子夜半窺之有二女在室排  
闥入俱不見送歸其家其父聘楊某以法治之二女先知  
或集葩經或集唐宋人句情詞悽惋不忍卒讀與生泣別

楊亦能詩勸之末句云祇今分付洛陽女好滌塵心赴碧  
天粉兒步天字韻云拆散鴛鴦各一天楊怒責之答云青  
邱吾自慣卽夜渡滹沱別生詩云緣分今朝淺狂風頃刻  
來郎情終未摯不許到瑤臺涕泣而去蓋花妖也

清溪署舊名黎廳傳云元樊法師西行過此植藜杖於地  
後藜重生高五十尺今已不存惟署東偏四適軒前老槐  
一株圍可數尺輪囷離奇似唐宋以前物或云武侯南征  
時植陳登龍作古槐歌云故黎大所堂東窠環生嘉木風  
瀟瀟中有古槐參雲霄高近百尺圍十腰孤幹聳直枝萬  
條參參碧葉霜不凋朝吞烟雲暮颼颼有時風至奔春湖

聲撼滄海濤頭驕誰其對此佳興饒吟髭撚斷韻初調携

成美句誇瓊瑤切乃俊逸參軍昭

史姚江先有詩

我行遠越邛峽

椒停驂三日令君招詩人蹤跡白雲遶獨有髯客如相邀

見之塵氛十斛消五年南柯夢迢迢豆箕馬齒午不囂何

時一覺蠲煩敲伴松侶桂游逍遙區區蟻穴何須要咏四

適軒四絕亦佳溽暑長途意似焚適人難得好風薰小憩

亭畔趺跏坐滿地槐陰鋪綠雲燕寢凝香榻擁琴使君韻

致似高岑浮塵十斛誰能浣魚鳥山林足賞音微名終愧

竹林賢敢遇洪厓笑拍肩原上青山山上樹耽他平子賦

歸田林花宿雨草盈庭牆外青螺潑畫屏靜對真教忘世



慮一池綠竹芰荷馨清溪地瘠苦得諸詩宛如仙境矣  
溫江葛秉敬字表一號熙臣康熙間歲貢生博學多能天  
文地理占卜遁甲無不精通爲岳奮威將軍幕友隨征清  
海料敵如神著有天文考辨西征備錄行軍紀畧等書喜  
作詩惜多散失解生篇云無求到處人情好天若有情天  
亦老悟此便是長生符解此便是忘憂草有人問我何解  
生試看日月相代明東升西入無停晷不聞勞勞亡其精  
虎豹在山龍在渚水自深深山自阻不見龍虎初鬥爭但  
聞風雲會樽俎龜遁伏兮鶴遠颺搏風鼓浪分潛翔龜齡  
鶴算動千載臧居衛毅何能殞人生本無涯巧慮苦自戕

我亦豈無智每一用之心傍惶毋寧爲巧寧爲拙君能諦

聽爲君說玩詩君子修養一道亦復功深行軍總紀七律

長排尤足以資掌故詩云天驕自古脫羈韁突厥匈奴熾

漢唐太宛縱能來騷駉沙漠誰復掃撓槍皇風一播九千

里醜類齊封十八王

國朝撫有西海前後封諸戎爲王貝勒貝子十八家

惡貫豈

知盈絕域殺機從此降穹蒼西寧城駐寅旄節

大將軍奉旨駐節

西寧征討賊黨羅卜藏貽青海殃

賊首羅卜藏丹金世爲盟長凡其同支異派皆得願指是以橫

刁遣覺構

封豕併吞蹂竹浪貔貅浩蕩出松岡

初丹仲死無嗣竹浪

此慘劫插漢丹金霸有其業羅卜藏丹金垂涎起始因糾合諸戎

協攻竹浪插漢丹金乞救奮威將軍岳奉旨提兵進剿

於雍正二年十一月初四日

遂由松潘出口兵馬前行桑泥麻望踰班右

桑泥麻望班右皆所

名地殺鹿龍溪取熱當殺鹿塘龍溪頭皆地名熱當西番

駐其地西去六十里有作爾格物藏播下共十三部落皆

兒更台吉所屬宰桑業墨戶率領部番沿途啟火逆我軍

威與西海相為聲勢舊威將軍是夜發兵三枝一攻熱當

一取播下一擣物藏作爾格巢穴大兵隨後策應及黎明

三路皆捷斬獲無數餘皆安物藏已經歸版籍兒更寧敢

犯戎行兒更台吉奔雷轟裘吉屠東轍風捲腥臊洗北羌

羅卜藏丹金之姪兒更白石免剗掠陝屬南川等處並舊

擄我歸德人民十二月初八日大兵至沐浴溝夜一更發

兵至出罵嶺剿平上寺東轍三百餘戶歸德有城存漢土

而下寺東轍番首至沐浴溝納欵行轅歸德堡古州也居民一千三百戶中設守備所官各一防

守兵一百五十名堡之東地名弓壩土千戶岩客樹興漢

奸革思尼交通羅卜藏丹金執明永樂時金牌需索居民

酷虐備至大兵到此並擒殺之弓壩喇嘛七慶郎索領其

番眾五百戶來降時十二月十一日也至十四日上下剛

密多並喇嘛阿里郡古思吉寺陸續來歸所獲糧草無算

闌門無地活僧狠閨門也升中臺下旌旗集塔耳寺前壁

壘揚二十四日大兵至閨門下營升中臺兵部各大人暨

母者悉令還俗番僧無復巢穴矣二十六已見三峰摧果

日兵抵西寧城以上自熱當抵西寧事蹟

密賊黨跋扈惟果密寺最勦劫殺南北等川阻梗道路創

然恃險負固聚眾三峯之上每峯三面臨崖中通一線險

峻十二月十九日三更發兵擊之賊聚絕頂插石雨

下奮威將軍鼓勵士卒從後指揮幾路齊登一鼓而克墜

崖者不計外斬首千餘級餘者聽其納款西來之捷惟此

戰焉更須一火盡沙糖驢眾攻之賊敗窮賊奔山頂羣人

石洞中隨命以草木青黃何計逃天外七慶傾心拜道旁  
塞其洞口焚斃無遺  
二月初八日大兵自西寧出征西海初九日七慶貝勒於  
巴爾出落地方迎拜道旁初十日兵駐克勒蒲土兒發兵  
取白什免與青黃台吉於拔漢爾吉分兵爾郭隆無完卵  
追擒兩賊及其宰桑部落剿殺五百餘人

在爾郭隆寺羅畢流免有集尸僵畢流免又名烏蘭木  
藏丹金之世守畢流免又言絕地也自  
十三日大兵自哈達圖徹夜追殺賊首羅卜藏丹金及賊  
黨吹拉克諾木齊十五日兵至天成插漢哈達逆賊已先  
逃而貝勒益楚克三渣兒與台吉噶爾旦待青引各台吉  
來降隨命追剿吹拉克諾木齊大兵於二十日至畢流免  
羅卜藏丹金鼠竄無踪隨搜山殺賊瑞音投向布隆吉先  
無遺擒獲賊母賊妹及賊妹夫等眾  
十九日兵駐布隆吉羅卜藏丹阿寶拘同克竹郎阿寶賊  
金之宰桑揣音率其妻子來降  
勒克竹郎賊妹絕命哈通歸地獄賊母阿爾泰哈通於三  
夫也皆入拘擥  
兒病遊魂窮寇落天荒蒙頭妻妾餘螻蟻乞食君臣剩糶  
死  
糠山西二客人往來貿易流落蒙古親見羅卜藏丹金率  
其妻妾宰桑共五騎蒙頭作女人狀沿途乞食而去  
諾木齊擒柴担木拉克諾木齊並其妻子牛馬數千三月  
初三日班師以上二月初八  
征西海三月初三日班師  
天塘僧伏爾加塘四月十五  
日出征卓

子等山二十一日兵至爾加塘其襍龍湯番首並綽爾北  
天塘喇嘛及斯俄多番子皆爾郭隆寺部落悉來歸順北  
川遠靜南川橋自此南北兩基子同收桌子囊四月二十  
箭兒溝殺賊數百二十八日至抒麻溝賊以木石塞路我  
兵以炮擊之焚其林木奪其險隘三十日渡陶賴河登山  
撲殺賊甚多至初九日於鎮羌驛分兵會勦寫爾率十三  
寺殺賊甚多至初九日於鎮羌驛分兵會勦寫爾率十三  
日兵至基子山麓下營於他臘都天王溝各處剿殺賊萬  
餘人二十五日攻取不毛山賊首紗帽藍占巴之姪阿呀  
子哈隆歎古六送各率部黨迎戰盡被殺擄惟達子噶住  
與札題藍占巴吶嘛拖壩相率報讎乃給以白旗安撫畢  
留兵駐防於二十八日班師滅跡卻灰仙密寺還於塗仲  
而桌子基子等山平靖矣數百而仙密寺番僧千餘先經  
他臘都川等處剿戮餘醜其囊索額望華藏給以千戶  
歸順者初四日至其地令其囊索額望華藏給以千戶  
移駐甲爾多寺約束諸番立還軍重渡襍龍湯初九日兵  
燬其寺屯駐官兵以便安營還軍重渡襍龍湯初九日兵  
以上剿桌子海驢免下年年月初兵出松潘口外路過巴  
等山事蹟

竹浪下營之地自羅兵插漢河邊夜夜霜追殺羅卜藏丹

焚惟有月色淒其而已金時過布隆吉

次插漢烏蘇萬里平沙風霜淒楚次日即於柴担靈塔岩

木擒獲吹拉克諾木齊逆賊黨類自是一空矣

餘仙子洞前兵過一坑海驢免路有靈塔岩洞傳苦圖免

失秀才張初征桌子山時搜張家苦圖免年方八歲眉目

本張姓者亦嘗為今上果兒自謂咽喉固追剿羅卜藏丹

之師故解送京師金時過都蘭果

兒昂噶地方夷人謂巴里誰教虎豹狂巴里者夷言如虎

咽喉之地曰果兒巴里也曾過巴里出落

巴里布誓眾將軍開幕府各處奏捷後諸王貝勒貝子台

哈等處誓眾將軍開幕府吉等齊集西寧城五月十一日

乃設盟壇於城內演武場眾將軍奮威將軍率同都統暨

各鎮至壇所升帳諸將隨列甲士環繞召諸王台吉及諸

逆跪聽宣旨畢上坐諸王台吉於帳下押逆犯等至申

明功罪分別刑賞如班朱納布坦乃犯我永昌截殺內附

肆行抗逆之人貝子阿拉布理與其妻工額妻父阿爾薩

朗台吉一家三逆各占內地蓄禍已深與西海全日舉事

之人格爾格濟隆與羅卜藏丹金先爲弟兄後爲郎舅之  
人敦多布達什因其胞弟貝子索諾木達什通信於內地  
殺其弟而汚其妻之人敦多布達什與吹拉克諾木齊狠  
狃爲奸令其屬爾加囊索傷我千總兵民之人阿齊奴木  
罕掠其胞叔插漢丹金殺其兄阿爾布坦劄木案且探我  
內信助賊口根犯戰於南川之人以上八逆暨有名賊黨  
男婦共十三人牽出斬首至有功之人一貝勒騰劄爾郎  
七慶貝勒乃丹仲妻父也永不從賊時通外信且招致多  
人來歸一吉噶爾丹待青乃達顏貝勒之弟與彭楚克  
三查爾力拒吹拉克諾木齊及大兵出口効命最多一劄  
薩克阿爾布坦乃插漢丹金之婿竭力軍前勤勞最著其  
次有郭爾濟諸顏格隆初爲圖爾虎特之種類曾受轄於  
羅卜藏丹金今爲喇嘛軍立功有成勞貝勒益楚克三  
渣爾始逆終順追挈吹拉克諾木齊者公策冷諾爾布於  
大兵出口卽來投誠者又次則羅卜藏插漢與茂茂克劄  
布二人今雖來降曾與阿爾布坦輩犯我新城堡高古城  
一帶虐害人民焚燬積聚冷策敦多布雖於大兵出口亦  
來投誠而助逆日久曾爲吹拉克諾木齊所殘害至於貝  
子拉入布勾引羅卜藏丹金害其胞叔插漢丹金亦梟獍  
之流也以上三等將軍詳定功罪奏請 旨意大章賞討



受俘 天子坐明堂紛紛露布標邊塞大兵自松潘出口

物藏播下以及上下東轍上下果密等處自西寧出征西

海復取桌子基子等山並剿平鐵布追殺羅卜藏丹金

疊疊貂裘 賜尙方皇恩汪濊於將將士鷹揚垂委珮問

閩雀躍慶壺漿凱歌翻作賡歌曲大捷之後天顏甚喜

御製詩幅及詩扇等物

將軍戰馬齊歸放馬場一代聖謨超混沌千秋神武

盛縹緲唐虞際會丹書重韓范功名青史香脫劍歸來

歌拜手烽烟萬古熄河湟

綿州涪水產劍魚形似鯉嘴長稍曲身左右

腮至尾界絲端直色鮮赤有重至百觔者劍

長餘氣鍾魚吐異光疑是專諸從座起醒風

旭陽官署西陲後下臨為池約廣三  
畝四圍栽竹芭蕉成林風雨夕眾鄉青  
簾奏如笙箏如羯鼓如馬陵鳴鏑震  
耳巨如鈞天廣樂無所不尾細如環佩  
丁東玉漏徐滴也市令馬君修崖架屋  
題額曰桂雨樓者予知昔王叔明為吳

人盧士恒作誌兩梅子卷倪雲林首倡  
詩李後和者如汪兩外史高青邱姚廣  
孝皆一代名流傑士吾齊郡寧門山樵  
張公名紳者與之誠一時盛事也余承  
乏於此既無名手爲之畫况亦能詩者  
題咏如君之豈可得哉或曰官舍如

傳舍馬君作梅不能居梅心者何獨慙  
余曰天下皆逆旅也築梅於家園鼎  
年後生遂爲吾子乎吾夜談於此宴象  
於此居此爲吾者矣獨不能詩奈何既而  
笑曰梅如吾者而儼然者之是梅可借詩  
獨不可借乎詎人題梅而梅諸詩其境同

其趣同即不啻乃就梅休所特借之与  
賓友吟詠隆公詩之美不勝收山樵吾  
鄉人也王達善爲作小傳云慷慨激烈不  
煩於世事作爲詩文雖不經意而自成  
一家北方豪傑之士也其爲名人傾倒如  
此必則借他人詩以爲借鄉爲輩詩多

詩云小窗怯暑雨冷氣飀衣病膚鋪牀  
閉齋閣衣被薰香鑪風燈苦屬挑夜  
茗更相呼煩囂悉屏逐妙理在跣趺  
憶子仲樞座茲情還者無張公又繼以  
詩若吾志未足而重爲索者更惱以陰  
韻竹梅結夜雨春鐙隔重簾一瓶中新

茗煮匱裏舊香添  
陰佩潛歸浦雪  
傲亂綴簷乍駭  
來湛更覺玄纖  
頗被凡相妒還疑  
雪與兼喜隨漚  
艇泊  
愁怕名窗淹頭  
白盧貞士高情  
苦未厭馬君築  
樓多詩余詩又  
不長傳既著隨  
筆於此而不傳  
斯樓余之過也

乃借詩以張之歸而詫於人曰張先生  
左蜀乃余侶乃豈非快事且不獨借  
吾郡張公謫兩詩凡生於蜀與去官於  
蜀者之詩採輯於斯梅大宮細徵拉雜  
崩騰如海斛明珠傾溢如盤而竹聲  
舊韻助其淒戾也又不獨借詩而已風



土物產怪、奇、皆、有、一、園、觀、而、補、吾  
園之所未、且、納、須、彌、於、芥、子、惟、斯、梅、是  
賴、故、以、是、乃、說、即、以、為、隨、筆、之、後、序、云  
時、久、多、雨、酷、熱、並、暮、祿、雨、之、衆、於、是  
乎、書、雪、嶠、之、培、荀